

東
華
續
錄

東華續錄

乾隆一百二十

臣王先謙敬編

臣周倫蕃恭校

乾隆六十年乙卯春正月甲申朔日有食之○乙酉翰林院檢討
謝啓祚一百二歲五代同堂予編修銜賜 御書扁額○丙戌諭
蘇凌阿自署理兩江總督以來辦理事務尙無貽誤但念伊年已
八十兩江事務殷繁精神究恐不能周到兩江總督員缺著福甯
調補畢沅前因竹谿縣邪教奪犯毆差一案降補山東巡撫咎在
失察尙非不可原宥之過著加恩仍補授湖廣總督畢沅當感激
朕恩倍加認真奮勉以贖前愆所遺山東巡撫員缺著王德補授
其刑部左侍郎員缺諾穆親著給都統銜調補都統而爲侍郎者
向所有也富綱前在雲貴總督任內於銅務錢法未能整頓其咎

較重姑念其咎止因循無能尙無別項情弊所有吏部右侍郎員缺加恩著富綱降補仍帶革職留任之案王德著卽馳往山東接印任事畢沅於交卸撫篆後再赴湖廣之任福甯俟畢沅到楚交代後卽赴兩江之任以便蘇凌阿回京供職朕辦理庶務一秉大公至正今已八旬有五日程萬幾無微不至於諸臣功過重輕黜陟從公權衡悉當內外大小臣工宜恪共職守交相儆勉以期無負朕宥過施恩至意○戊子諭朕普錫春祺業經疊頒恩旨嘉惠臣民復命查從前臣工內因過誤有賠項未清者經軍機大臣開單具奏如文綬裴宗錫閔鶚元福崧陶易五員俱會緣事查抄其名下尙有未完銀兩朕臨御六十年辦理庶務一秉大公至正於諸臣功過權衡輕重賞罰從公寬嚴悉當從不稍事苛求此等緣事查抄之員皆因其在任時或瞻徇貽誤或訛法營私其籍沒家

產實屬罪由自取所有未完銀兩本應著落該家屬子弟照數賠繳第念丙辰年卽屆歸政之期見當睿詔令節覃敷愷澤破格施恩著將文毅等五員名下未完銀兩槩予寬免此外如何有似文毅等之曾經查抄家屬實在無力完繳者並著各該旗籍查明具結咨報戶部題請豁免以示朕法外施仁恩加無已至意○調陳用敷爲貴州巡撫英善爲湖北巡撫○辛卯諭朕自臨御以來恭遇郊廟大祀無弗祗肅躬親卽中祀之禮亦多親詣舉行嗣因年屆八旬曾經降旨所有中祀典禮如先農朝日夕月等壇俱於八旬前兩年內以次親祭一周原因年壽日高恐筋力或有不逮是以中祀之禮於五十五年以後不復親行今思先師孔子道集大成師表萬世朕自沖齡服膺聖教久而無倦凡行政典學悉皆得自心傳况丙辰年卽係歸政之期本年爲

朕御極六十年二月上丁允宜展禮 宮牆用申企慕此次 文廟釋奠朕親詣行禮以昭崇儒重道之誠其應行典禮著該衙門照例豫備○諭李侍堯前在雲貴總督任內婪索屬員革職治罪並將伊所襲伯爵另襲嗣因其辦理臺灣軍務尙知奮勉加恩賞還今雲貴小錢充斥經福康安查明皆係從前局鑄偷減所致富綱才具平庸其不能整頓無足深責李侍堯是朕深知能辦事之人乃與局員上下通同牟利偷減錢法滋弊使其身尙在必當從重治罪今雖已故豈可令伊子嗣復邀五等之封但伯爵乃伊祖功勳世襲罔替之職不忍革除所有李侍堯子毓秀見襲伯爵著卽革退仍留侍衛當差交該旗查明應襲支派另揀承襲以爲督撫大員孤恩溺職有心貽誤者戒○己亥賜荷蘭國王噶喇吧喇哇哪唆敕諭曰朕仰承 昊粹寅紹丕基臨御六十年來四海永

河萬方向化德威遠播福畢臻統中外爲一家視臣民若一體
推恩布惠罔間賁瀛億國梯航鱗萃徠賀朕惟勵精圖治嘉納款
誠與爾眾邦共溥無疆之庥甚盛事也咨爾國重洋遙隔丹悃克
抒敬齋表章備進方物叩祝國慶披閱之下周詳懇切詞意虔恭
具見慕義輸忱良可嘉尙爾邦自貿易舉門厯有年所天朝懷柔
遠人無不曲加撫恤如博爾都噶里亞意達哩亞英吉利等國效
順獻琛天朝一視同仁薄來厚往爾邦諒備聞之今來使雖非爾
國王所遣而公班衙等能體爾國王平時慕化情殷屬令探聽天
朝慶典具表抒忱茲值天朝六十年國慶公班衙等因道遠不及
稟知爾國王卽代爲修職來庭則感被聲教之誠卽與爾國王無
異是以一律優待示朕眷懷所有齎到表貢之來使小心知禮已
令大臣帶領瞻觀錫予筵宴並於禁苑諸名勝處悉令遊覽使其

叨茲榮寵共樂太平除使臣恩賚疊加及各官通事兵役人等正
賞加賞各物件另單飭知外茲因爾使臣歸國特頒敕諭錫賚爾
王文綺珍物如前儀加賜綵段羅綺文玩器具諸珍王其祇受益
篤忠貞保乂爾邦永副朕眷欽哉○癸卯諭新正開篆之期朕欲
載敷愷澤渥溥春祺而自去冬迄今疊頒恩旨嘉惠臣民恩施已
無可復加惟思各省地方官於督緝承緝不力例有處分但地方
大小官員緝盜安民是其專責今往往心存玩視懈弛貽誤卽如
劉之協爲邪教要犯一任其乘間逃逸日久未能拏獲可見各省
督撫以至州縣於督緝承緝皆不能各矢天良認真辦理若再將
應得處分予以寬免則大小官吏益復無所儆惕何以肅吏治而
靖奸宄但念各省節年未完民欠銀糧業已格外加恩全數豁免
則地方官經徵不力之處分不妨姑寬所有此次豁免積欠以前

各地方官應得前項豁免錢糧處分均著加恩交部查明槩予寬免以示錫福延禧恩加無已至意地方官若不感動天良實心任事以爲再有過犯亦不過如是寬免則所謂豚魚不及者矣○庚戌免江西五十七八九等年緩徵銀穀○壬子諭本日刑部奏審擬正白旗滿洲輕車都尉喀甯阿毆傷庶母任氏致令自縊身死擬發黑龍江當差又原任浙江溫處道高樹勳追項未完查明並無產業擬流折枷其應追銀兩請旨豁免二摺所辦皆屬大錯喀甯阿係伊父四十一長妾王氏所生亦妾所生非嫡子也卽嫡子亦不應如此犯倫任氏乃四十一之次妾會生女二姪年已長大卽係喀甯阿同類之庶母乃任氏向其索要棉襖既不給與輒敢拳抵腳踢致任氏受傷後遂氣忿自縊是喀甯阿陵辱庶母致令輕生自應問擬抵償何得率引毆傷父妾之例僅擬發黑龍江實

爲寬縱喀甯阿著改爲應絞監候入於情實至高樹勳久任道府廉俸優厚其所借欠張謙良名下應繳城工銀兩止一萬四千餘兩何至不能完交所稱咨查該旗屯及直省各督撫實無隱寄財產之處俱不足信若如所奏將該員擬徒又以旗人例折枷免其追繳伊轉得安居屯莊擁貲坐享何以示懲朕固不爲己甚不加深究此項銀兩不值再行查追卽著豁免但其捏飾之情罪未便寬減高樹勳著發往伊犁給厄魯特爲奴仍交沿途各督撫派員小心管解如有疏脫等事惟該督撫是問試思當得何罪刑部辨此二案錯謬已極自因朕上年屢降恩綸疊施愷澤丙辰年卽屆歸政之期遂爾事事顛預意存姑息以邀人譽殊不知一切法律朕可以法外施仁臣工等豈得擅行市惠若似此一味輕縱於政治大有關繫不特朕未歸政以前斷不肯任其蒙混卽歸政以後

朕亦豈置天下之事於不問維時若臣下等敢於嘗試更當重治其罪決不因歸政而稍存寬貸也今刑部堂官於此二案已露其機辦理大錯殊屬昧良俱著交部嚴加議處以示懲儆朕臨御六十年辦理庶務惟日孜孜從不稍存懈怠大小臣工務宜各矢天良交相儆勉以副朕教誨成全至意

二月癸丑朔諭陳用敷奏覆訊阮沈郭彥忠供情卽行解京一摺據稱前此提訊余洛未將劉之協如何脫逃及阮沈等私與往來各情節詳細究出嗣因緝無蹤迹復同至潁州向阮沈郭彥忠究訊始據供出劉之協與阮沈分手後至周家口劉之協趕上十八日在八丈溝分路劉之協有往太和縣雙柏園地方史有義家之語隨委知縣吳甸華密拏史有義等審訊據供劉之協雖到伊家住宿旋即逃往湖北樊城鎮蘇明亮家躲匿卽委吳甸華於正月

初七日馳赴樊城密緝並知會湖北一體協拏等語所辦大錯劉之協爲邪教要犯在扶溝脫逃後日久無獲屢經降旨嚴緝至再至三陳用敷既經提訊阮沈等供出劉之協逃往樊城蹤迹並於正月初七日業經委員前往查拏正可從此跟蹤緝獲該撫卽爲見長亦應將訪有蹤迹之處先行馳奏以便及早飭交湖北嚴緝此時已經就獲亦未可定乃從無一字奏及直至軍機大臣審出具奏降旨飭詢始將辦理緣由具摺入告今日始到若非朕詢問則此等緊要情節此時尙未必奏及糊塗已極况陳用敷身任巡撫於此等查拏要犯之事既究出潛脫蹤迹甯不當親身前往查拏乎乃僅委之知縣微員前往躡緝此等知縣想不過如劉清鼐之庸懦無能今委令查拏設辦理不能嚴密又致劉之協聞風遠遁更復成何事體前此畢沅在湖廣總督任內因竹溪縣奪犯段

差一案安坐省城未經親往查辦特降爲巡撫以示懲儆此係上年九月之事陳用敷豈未聞知况劉之協更爲邪教要犯尤非尋犯毆差之案可比乃僅委令知縣前往又安用此巡撫爲耶且據奏稱劉之協在扶溝脫逃後曾回至太和在史有義家住宿旋即逃往湖北樊城是劉之協自扶溝逃逸後曾經回至太和逗遛當此查拏嚴緊之際而安省地方官員豈竟毫無聞見所司何事何得僅以劉之協解往扶溝業有印信回照卽全行推諉豫省安徽卽置緝拏要務於不辦又陳用敷旣知阮沈郭彥忠劉之協在扶溝私相往來同路行走明有聞風通信情弊卽應向該犯等切實究詢乃摺內尙稱蘇凌阿接奉諭旨自必兼程同赴安省審辦見在遵照指出各條研訊確情會同具奏等語蘇凌阿已命往江西查辦事件距安徽較遠豈能卽日起回陳用敷又何必坐待蘇凌

阿始行會同具奏尤屬推諉看來近日督撫等於地方事務竟全不認真陳用敷辦理此案顛倒錯謬實屬可笑可恨殊出意料之外著革職解交刑部治罪所有貴州巡撫員缺著姚弢調補成林在廣西道員蒞臬任內辦理安南事宜本爲安熟其廣西巡撫員缺卽著成林補授朕臨御六十年勵精圖治惟日孜孜於大小事務及臣工功過無不一秉大公權衡至當不肯稍有顛預從前

世宗憲皇帝臨御十三年整頓肅清傳位於朕今丙辰年卽屆歸政所有各省及諸部鉅細政務稍有因循懈弛必倍加振作以期中外整肅付之嗣皇帝卽歸政以後亦豈肯置天下事於不問彼時臣工等設有玩誤之處更當重治其罪決不因歸政而稍存姑息見在大小臣工儻因朕歸政在卽稍存懈怠忽輕爲嘗試尤當加倍懲治恐不能當其罪也特此再行宣諭臣工等務宜倍加謹慎

共知奮勉以副朕諄切訓誨至意○甲寅 上御經筵○以錢受

椿爲廣西布政使

由福建按察使遷

○乙卯諭蘇凌阿奏據江甯副將明

泰稟稱有六安州文生陳以甯於正月十七日前赴撫臣陳用敷處面稟情願緝拏劉之協求發護身牌稟陳用敷欲派撥弁兵同往伊恐人多洩漏未肯帶往隨給與護票前去該副將因見其人語言清朗就近稟知陳用敷帶同眼纜兵役改裝易服暗暗跟隨前往幫拏等語此事陳用敷昨日所奏之摺並未提及殊不可解陳用敷上年因調任安徽來京陛見時奏對之次朕本不甚滿意因安徽事務較簡或尙可期勝任乃陳用敷於審訊阮沈郭彥忠一案業據供出劉之協逃往湖北樊城蘇明亮家躲匿情節於正月初七日已委知縣吳甸華前往查緝而事隔多日並無一字奏及又不親往查拏並欲坐待蘇凌阿到後會同究訊具奏種種錯

謬推諉置緝拏要務於不辦實出意料之外是以降旨革職解交刑部治罪今蘇凌阿奏六安州文生陳以甯面稟陳用敷自請緝捕劉之協係正月十七日之事距伊上次發摺之期已越七日陳用敷卽爲見長討好亦應一奏塞責乃該副將尙知事關緊要稟知督臣而陳用敷竟不據實迅速奏陳又未行知蘇凌阿是何意見該生緝拏劉之協自應帶同眼綫兵役前去而陳用敷僅給護票經該副將見其人尙明白恐有別項隱情稟知陳用敷始行添撥跟往是陳用敷見識遠不如該副將之曉事似此緝拏要犯種種遲延糊塗可笑卽革職拏問亦屬罪所應得今僅解交刑部治罪尤屬僥倖於此可見督撫等地方事務不能實心經理卽便混過一時日久未有不自行敗露者朕於臣工功過一秉大公至正惟視其人自取各該督撫等惟當益加謹慎以陳用敷爲前車之

鑒也○以李殿圖爲福建按察使

由甘肅鞏秦階道遷

○丙辰湖廣提督劉

君輔奏正月二十二日准鎮筵鎮總兵明安圖咨稱黔省松桃廳

屬大塘苗人石柳鄧聚眾不法恐竄入楚境見帶兵堵截旋於二

十五日據鎮筵遊擊田起龍等稟稱偵聞永綏廳屬黃瓜寨苗人

石三保糾眾搶劫由永綏之黃土坡及鳳凰廳之栗林燒毀民房

殺斃客民見在竭力保護城池等語臣恐石三保等或與大塘苗

人勾結檄派永綏兵五百靖州兵三百沅州兵三百辰州兵二百

常德兵一百速赴鳳凰栗林一帶聽用並咨會督撫臣外臣卽帶

本標將弁及戰兵六百名前往辦理諭軍機大臣等貴州湖南等

處苗民數十年來甚爲安靜守法與民人等分別居住向來原有

民人不准擅入苗寨之例今因日久懈弛往來無禁地方官吏暨

該處土著及客民等見其柔弱易欺恣行魚肉以致苗民不堪其

虐劫殺滋事迨至釀成事端又復張皇稟報看來石柳鄧石三保等不過糾眾仇殺止當訊明起釁緣由將爲首之犯拏獲嚴辦安撫餘眾苗民自然帖服何必帶領多兵前往轉致啓其疑懼甚或激成事端是因一二不法苗民累及苗眾成何事體劉君輔係行伍出身擢至提督未能深曉事體一聞稟報輒調兵二千名之多辦理未免張皇所奏又無頭緒著傳諭福甯卽行前赴該處駐紮辦理福康安素嫻軍旅貴州是其所屬想福康安得信後或不待朕旨已馳赴黔省督辦亦未可定但福康安係該省總督聲勢較大恐苗民聞福康安前往疑爲帶兵往剿羣懷畏懼所關匪細著傳諭福康安如已起程到彼止須不動聲色查明妥辦於大局辦定後卽速回滇省以免苗民驚疑若福康安尙未起身察看情形或可無須親往福康安係曉事之人經練日久自能權衡輕重辦

理妥協也○丁巳釋奠 先師孔子○諭朕臨御今六十年於二
月上丁親詣 文廟釋奠禮成並閱辟雍新刊石經瞻仰 宮牆
黼黻景慕自惟沖齡肄學服膺 聖教迄今八袞開五猶日孜孜
誨學無倦舉凡行政念典悉皆虔奉心傳今晨臨雍展敬祇肅躬
親風日暄和典禮咸備景仰之誠 先師靈爽式憑自必默垂鑒
佑當茲邇運增隆慶臻耆壽莫非仰邀 錫貺允宜施恩黌序嘉
惠士林以光盛典所有各直省歲試入學名數著交該部查照向
例分別廣額其太學肄業諸生並加恩免其坐監一月用示重道
崇儒壽世作人至意○諭本日上丁釋奠禮成因念朕臨御六十
年以來孜孜勤政悉繇典學懋修罔弗衷諸 聖道回憶沖齡就
傳之時福敏啓蒙授業循循善誘加增日課得以多讀經書蔡世
遠教以古文作法宜學昌黎朕從此問津肆力學業益進至今所

作古文無不理明氣盛是當年久侍帷幄敷陳啓沃實福敏蔡世遠兩師傅之力爲多今年登八旬有五眷懷舊學尤宜秩贈三公原任大學士太傅福敏著晉贈太師原任尙書蔡世遠著加贈太傅並各賜祭一壇福敏著派舒常致祭蔡世遠原籍著派福建巡撫親往致祭以示朕眷隆耆舊崇禮師儒至意○諭本日朕親行釋奠禮成閱辟雍新刻石經據該管收掌官蔣和呈進恭錄御製序四體字冊並石經告成頒冊觀其文理尙優且伊係蔣衡之孫此次所刻十三經卽係從前蔣衡手書進呈之本字畫俱屬端楷今茲列碣圓橋洵爲右文盛事蔣和能承家學著加恩以國子監學正學錄補用並著賞大段二匹以示表章經學獎勵宿儒至意○諭軍機大臣等朕臨御六十年八表開五本年仲春親祭心殿臨御經筵越三日釋奠 文廟禮成臨幸辟雍閱視石經碑

刻連日舉行典禮御製詩四章用申仰止景行至意蔡新朱珪學
問尙優孫士毅亦嫻文義著將御製詩章鈔寄閱看卽令恭和進
呈朕自幼讀書服膺 聖訓爲治世臨民矩矱迄今年逾耄耋典
學孜孜蔡新等當知此意恭和之詩毋徒以頌而忘規也至福康
安雖於文墨之事非其所習但伊屢膺闕寄懋著勳勞今遠在滇
南不克恭襄盛典亦著將御製詩鈔寄閱看使之同深欣慶著賞
給福康安祭糕及新製奶餅以示優眷○戊午調任湖廣總督福
甯奏臣於正月二十九日途次據署辰州府知府朱紉蘭稟報乾
州城已被圍倉庫亦被搶劫並聞署乾州同知宋如椿巡檢江瑤
俱已殉難各路苗人約有數千鎮筸鎮臣明安圖在永綏鴉西地
方被阻當卽飛飭提臣前調沅靖各府兵速赴鴉西地方應援又
檄調湖南撫標及岳州長沙常德澧州等營兵二千名令該管將

備帶領前往會剿臣卽督同提鎮相機剿捕諭軍機大臣等此事
前據劉君輔奏到朕尙以爲不過該處苗民互相仇殺無須大辦
今閱福甯所奏竟係逆苗等聚眾不法膽敢搶城傷官必須痛加
剿除以儆兇頑而彰國憲福康安久嫻軍旅屢著勲績雲南距湖
南較近且黔省亦有苗人石柳鄧滋事之處想福康安一接稟報
早已馳赴該處督辦貴州兵力素爲勇健著福康安於路過貴州
時卽酌量情形調撥帶往聽用如軍營有需員差委之處滇黔兩
省道府內亦不乏人福康安可酌選帶往沿途加緊行走以便迅
速到彼相機剿捕此時總以翦除逆苗擒拿首惡離散黨與並安
撫別寨苗人勿致驚疑煽惑爲要其歷任地方大小官員任聽客
民欺陵苗人肇釁滋事起自何時不妨俟事竣時再行查辦福甯
見已起程前往湖北至湖南程途更近自可先福康安到彼福甯

前在蘭州雖會隨同辦理撒拉爾逆回軍務但究不及福康安之
久歷戎行聲威素重著傳諭福甯至彼察看情形如能剋期辦竣
立端賊氛卽一面將首從各犯速行剿除一面知會福康安不必
前至湖南如酌量不能剋期完竣莫若飛行知會催福康安迅速
前來剿辦福甯當加意持重不可稍涉疏虞再劉君輔本係永州
鎮總兵上年來京陛見看其人尙明白且經出兵是以擢用提督
乃昨閱所奏辦理漫無頭緒恐未可深資倚仗此時正在帶兵剿
賊止可加之鼓舞責成該提督出力擒捕但苗疆員缺緊要並著
福康安留心察看於事後將該提督能否勝任之處據實奏聞至
福甯前已調任兩江總督但湖南見有剿捕逆苗之事福甯不可
拘泥已經調任於畢沅到後卽思交印起程該督此次前赴湖南
自必帶印前往仍當經管督篆董率地方文武將剿捕撫綏各事

宜妥爲籌辦畢沅目下亦將到楚湖北省城有惠齡在彼足資照料畢沅係該省總督雖未經接印接奉此旨亦卽速赴荊州常德等處適中之地駐紮籌辦糧餉軍火等件以期源源接濟○庚申諭本年京察屆期吏部開列在京各部院三品以上大臣及各省督撫請旨甄別具題朕詳加酌覈阿桂和珅王杰福長安董誥在軍機處行走或近日書諭不能稱旨或繕寫事件率多錯誤其各部院大臣亦並無出力奮勉且有曾經獲咎加恩原宥之人況屈三年京察一次大臣中有勤奮供職者予以甄敘原係朕格外施恩而各大臣等勤慎稱職亦分所當然若每次照前甄敘視爲泛常不但不足以示獎勵亦非三載考績之道此次俱著毋庸議敘侍郎成策人甚衰庸伊齡阿辦事模稜不肯出力內閣學士翁方綱前在山東學政並不能約束家人近看其和詩學問亦屬平常

俱著交部議處至各省督撫內除福甯見在湖南辦理剿捕苗匪事務俟事定再降諭旨外福康安勒保和琳或勤職封疆或宣勞邊徼李奉翰管幹貞尙能速漕利運奏承恩近於督緝盜犯亦屬認真妥協俱著交部議敘餘皆著照舊供職朕臨御六十年辦理庶務惟日孜孜於臣工功過無不一秉大公權衡至當內外大臣宜交相儆戒倍矢慎勤以副朕諄諄訓勉至意尋吏部以遵旨分別議敘處分奏得旨本年京察大典吏部將侍郎成策等按六法分別議以勒休革任固屬照例辦理第念成策止因衰庸不勝侍郎之任尙可留副都統供職著仍帶革職留任所有兵部侍郎員缺另候簡用伊齡阿在內務府園庭行走有年尙爲熟諳著加恩改爲革職留任以觀後效翁方綱著降補內閣侍讀學士仍帶降二級從寬留任福康安勒保和琳李奉翰管幹貞奏承恩俱著加

一級○乙丑予故多羅誠郡王弘暢祭葬諡曰密○丙寅諭軍機大臣等本日閱姜晟所進圖內永綏松桃一帶迤西與四川酉陽州接壤亦係苗疆此時石三保等糾眾滋擾乾州廳倉庫業經被搶而總兵明安圖珠隆阿又有被賊圍阻之事設該鎮等稍有疏虞賊匪等肆出搶掠竟思西至酉陽地方煽誘該處苗民不可不豫爲防範且賊匪一經官兵進剿並恐四散竄逸有逃入川境者亦當堵截擒拏和琳於正月初八日過察木多計此旨到時諒已過打箭爐在成都一帶著傳諭和琳暫緩來京卽接受督篆帶印速赴酉陽一面密派官兵以巡邊爲名豫備應用此時且到酉陽駐紮選爲聲援安撫該處附近苗民勿得被其煽誘如有湖南逆苗竄入者立即截拏究辦孫士毅交卽督篆後仍著暫留四川省辦理報銷設將來剿捕事宜有需和琳帶兵策應之處孫士毅亦

可在彼兼辦軍需供應一切以期多一人多得一人之益○辛未諭軍機大臣等福甯前於岳州發摺後途次接據稟報甚多並不隨時陳奏殊爲遲緩此次所奏仍未甚明晰又據姜晟奏保靖瀘溪兩處已先後派兵堵禦無慮疏虞惟賊苗忽聚忽散須酌籌路徑乘勢進剿一俟各兵調到卽行分頭剿捕所辦尙是看來此事姜晟籌辦較有眉目而福甯見賊蔓延未免心存畏葸布置一切不能得有把握見在楚省調派官兵已及萬餘福康安自黔省前來亦必帶領黔兵數千軍威已極壯盛見又派巴圖魯侍衛章京令護軍統領德楞泰帶領由驛馳往德楞泰前隨福康安當軍營翼長屢經委用自可得力况福康安久歷戎行聲望素著諒此烏合之眾無難一鼓殲擒福甯惟當鎮靜辦理隨同福康安察看道路情形通盤籌畫相機進剿勿使苗匪東西奔竄四出驚擾至保

靖爲永順門戶瀘溪爲辰州門戶賊苗在兩處攻擾而保靖地方有永順苗匪張廷仲父子集聚數千人撲城奪卡勢尤緊急雖經福甯檄調兵丁令宜昌鎮總兵張廷彥帶兵前往應援猶恐途遠緩不濟急福甯當酌量事機如永順保靖一帶有急須策應之處福甯卽行親帶官兵前往應援剿捕其鎮筸城外賊匪雖未退散但見有提督劉君輔在彼堵禦卽使該提督不能帶兵進攻而防守尙可無虞福康安等惟當便宜調度以期迅速集事至劉君輔前次所奏之摺總不明晰業已降旨飭詢卽如賊匪於二月初五日至鎮筸城下攻擾雖經劉君輔殺退而賊匪仍未竄逸尙在附近山險地方出沒意存窺伺自二月初五日以後又已多日卽或賊匪未敢復來城下劉君輔亦應帶兵出城偵探賊匪屯聚之處痛加剿殺甯有賊至始行迎擊賊退仍復生待之理况賊匪句

結糾聚人數較多雖烏合之眾原無紀律然山險要隘之處必有拒守卡寨藏匿巢窟若能出城接捕或可追蹙賊蹤乘夜襲擊劉君輔何以計不出此惟知株守城中稽延時日耶再福甯奏盤獲奸細身帶硝磺遇便放火苗匪從何得有此項硝磺該管地方官吏甯不應早爲查察著於事定後一併查辦又據楊光熊奏稱珠隆阿等於正月二十八日帶兵打仗殺賊三百餘人並有苗民石老三等堅守本寨與逆苗對敵此係極好消息可見苗匪勾結滋事大半出於脅迫其中安分畏法苗民能知大義者正復不少不可不急爲獎勵所有石老三一名著加恩賞給六品頂帶其隨同拒賊者仍著福康安等查明加以厚賞並卽徧行曉諭苗民等涵濡王化本爲恭順見在滋事不過無知頑梗之徒卽日官兵會剿悉就殲誅其安分苗民斷不可爲其煽誘如有堅守本寨剿殺逆

苗者必一體優加賞賚若一時偪脅從賊之人能將賊苗頭目設法擒獻尤必奏明寬宥加賞福甯當出示安撫眾苗明白宣諭使苗民等知所勸勵黨與亦可漸就離散以見在情形而諭貴州賊匪屢被官兵剿殺自必竄入湖南境內福甯等厚集多兵縱不能悉力進攻豈此等逃竄賊匪亦不能帶兵剿殺耶見在事機順遂福康安此時已抵軍營聲威百倍士氣奮揚速盼捷音之至○乙亥諭軍機大臣等福康安奏行抵鎮遠飛調官兵會剿一摺所見均爲得要此次楚省所辦遲延觀望殊不滿意今福康安已抵鎮遠因松桃止大兩處苗匪尙在圍伺未退飛咨提督等先爲疏通松桃銅仁後路然後進剿各匪巢徑四路舉兵剿戮是黔省苗匪雖聚散無常見在四路俱有官兵堵截自可無虞竄逸福康安於黔苗剿捕淨盡後即可前赴楚境併力殲擒至福甯奏查詢起釐

根由據百戶楊國安供苗人生計本薄客民等交易不公與苗人
爭執以致生變等語亦殊不可信客民與苗人交易不公彼此爭
利固屬事之所有但外省地方胥吏兵役往往藉端滋事卽安分
良民尙被擾累何況此等苗民豈有不恣行陵虐之理而地方微
末員弁任意侵欺亦事所不免何得僅以客民交易爭執卽爲起
釁之由此事著福康安於事定後必須切實查詢究明嚴辦以示
懲創而靖苗疆此時福康安自已將黔省逆苗搜捕卽到楚省合
兵攻剿佇盼捷音之至○己卯以伍彌烏遜爲兵部右侍郎○庚
辰以鄒炳泰爲內閣學士原任內閣學士○辛巳諭軍機大臣等福甯奏
剿殺賊苗奪梁拏卡一摺此奏略強人意速盼捷音之至但閱摺
內稱蘇靈帶兵六百名於二十日辰刻方到午刻卽率領官兵由
東面上山至頭卡向西迎敵搶上山梁占住得勝坡獅子口二處

劉君輔在賊後面往上直撲兩路夾攻福甯在緊對山梁用礮轟斃苗匪數十人賊始紛紛逃竄等語蘇靈曾經出兵前據該鎮奏帶兵前往時朕卽以爲此人必能得力今果奮勉殺賊實屬可嘉是此次剿殺賊苗由蘇靈帶兵前往迎敵搶上山梁占住地勢福甯劉君輔不過在後策應看來福甯前此竟因賊勢滋蔓不免心存畏懼株守鎮守一籌莫展今因蘇靈帶兵到彼有所倚賴始得有勝仗可見該督之無能本日據姚綦等奏接准福甯咨會令在交界地方一體堵截等語廣西雖同係苗疆而距見在苗匪滋事地方遠至數百里及千餘里不等何至紛紛咨會堵截卽此一端是福甯辦理此事竟係毫無主見惟仗福康安迅速來楚督率進剿以期剋日蕲功再蘇靈於初二日自永州起程所帶官兵六百名爲數亦少永州距鎮守一千七百餘里該鎮於二月二十日辰

刻卽已齊集至彼行走迅速洵屬奮勉可嘉何以福甯昨奏未到官兵尙有五千餘名當此行軍之際一經派調自應星速前往隨同剿捕豈容途次耽延著傳諭福康安於到楚後務宜按各處檄調之兵道路遲近詳細確查如有任意遲延者卽將帶兵之將領據實嚴參以示懲儆其行走妥速奮勇者亦卽查明獎賞

閏二月甲申福甯奏前據永順協副將慶博稟報窩喇寨苗人張廷仲聚眾不法見與兇苗石大貴等仇殺當經密札該副將及知府戴求仁等設法離間張廷仲令其立功自效茲據遊擊李光榮報稱張廷仲來營面稟聚集多人原爲堵截貴州苗起見並非別有不法連日被石大貴追逼因自投表明心迹查張廷仲束手來歸自係爲黔苗殺敗若卽究明治罪恐伊子等窮無所歸轉與石大貴合而爲一見擬札諭張廷仲先給千把總職銜並令寄信伊

子及張星奇等率領苗人併力堵殺石大貴立有功績卽代爲具
奏請旨諭軍機大臣等福甯自赴湖南辦理苗匪以來籌畫布置
均未合宜止有此事差強人意與昨降諭旨相合但張廷仲旣
已投出福甯自當示以寬大仍行遣回以廣招徠而離黨羽轉不
必留於永順致啓賊疑乃福甯將張廷仲扣留不放卽使將伊正
法亦止殺一張廷仲於賊眾毫無所損莫若卽行釋放回寨縱或
心懷狡詐釋放後又有反覆賊苗中亦不過多添一人何足爲輕
重况張廷仲之子及張星奇擁眾萬人尙未解散設聞張廷仲被
留竟糾約夥黨前來劫奪又將何以禦之是留一張廷仲或恐別
生事端而釋令回寨使賊黨萬餘同心效順以一人而安萬人之
反側豈不甚善此旨到後著該督等卽行傳諭張廷仲以爾聚集
苗眾原爲堵截黔苗今被追迫自行投誠之處業經代爲奏聞深

蒙聖恩嘉獎格外施恩賞給六品頂帶並令爾卽行回寨爾當感
激天恩率同爾所聚苗眾奮勇剿殺黔苗爾果能實心出力或將
石柳鄧石大貴擒獻必當格外仰邀恩賚加授官職卽不能擒獲
黔苗逆首但能堵殺黔苗卽係爾之功績如此明白宣諭示以恩
信張廷仲自必誠心效力可收以苗攻苗之用卽或不能殺賊而
賊黨中少此萬人助惡於事大有裨益○乙酉大學士公管雲貴
總督福康安奏連日察看苗寨情形先差兵役繞道前往正大營
飭知提鎮約日出城迎合二月十九夜臣與總兵花連布等分路
直前行至盤塘坳地方已係五更時候探知該處苗寨叢雜卽令
連拋火彈燒斃苗匪多人其寨內逃出之賊亦多殲戮迨天色漸
明對山賊匪鳴鑼吹號四面苗賊來拒我兵槍礮並發各從山旁
溝路飛攀而上奮力攻打殺賊百餘搜獲米糧二千餘石提臣一

聞槍礮聲立即帶兵出城會合城內外難民聞知燒寨獲糧皆踊躍前來當將米全行散給仍於盤塘坳安營一俟大兵齊集即進攻松桃嗅腦等處諭軍機大臣等黔省苗匪勾結蔓延滋擾梗塞道路今福康安一到銅仁不待兵齊即帶見在官兵分路進攻立解正大營之圍痛殲賊眾將盤塘坳地方苗寨焚毀數處斃賊多名實屬快意之至見在大兵雲集松桃嗅腦等一帶道路應已開通其要處剿平烏合餘匪自必紛紛四散福康安由黔赴楚時和琳剿除秀山賊匪肅清後路亦可帶兵前來會合與楚省官兵併力夾攻勢成破竹愈盼捷音速至福康安著賞給玉搬指一箇大荷包一對小荷包四箇以昭優獎總兵花連布此次打仗殺賊亦爲得力並著加恩賞戴花翎至畢沅奏稱據署辰州府知府朱紉蘭稟報永順苗匪張廷仲與貴州苗匪石大貴仇殺敗逃之後爲

營員盤獲見在解赴辰州親往嚴訊等語此事與福甯昨奏情形迥異朕思張廷仲係永順苗匪爲首之人聚集黨與至萬人之多安能卽行盤獲縱使與石大貴仇殺何至一時殲戮殆盡遂致隻身逃竄且貴州苗匪石柳鄧等滋事不法張廷仲因何亦聚多人前往保靖滋擾昨據福甯奏張廷仲旣已前來伊子及張星奇並伊手下糾聚之人見在何處是否隨同張廷仲前來屯聚附近地方候信抑係敗逃渙散或俱歸附黔苗之處福甯前奏摺內俱未詳悉聲明想畢沅已接到福甯咨會馳抵該處卽將指出各情節逐一根究據實具奏至此事先係永順協副將慶溥稟報福甯進呈札稟內又有前給該副將及知府戴求仁札諭字據始續據遊擊李光榮稟報投出是否係慶溥稟報在前抑慶溥李光榮等接到福甯札諭始行設法招致前奏實不明晰而本日畢沅所奏被

營員盤獲之語又係接據署知府朱初蘭稟報彼此情形互相歧異若非文武各員彼此遮飾邀功將盤獲捏爲招致卽係福甯作爲前給札諭豫占地步二者必居一於此畢沅抵辰州卽先行詳查覆奏福康安到楚後亦將以上情節覆加確訊詳悉查奏勿任稍有偏倚○丙戌諭此次黔楚邊界逆苗滋擾延及四川秀山一帶各該省督撫一聞信息前後帶兵馳往該處會商合剿內惟福甯自抵辰州鎮竄以來籌畫布置全未合宜又不能帶兵殺賊無庸議敘外福康安一得苗匪滋擾之信卽馳赴銅仁籌辦一切旋赴正大營帶兵督剿痛殲賊匪立解城圍疏通道路實堪嘉尙畢沅自抵常德後諸凡用心合宜亦屬可嘉和琳自藏回京一入打箭鑪於途次得黔省苗匪滋事之報卽奏明馳往先後撥派將領兵丁前赴邊界嚴密堵截所辦亦爲得要姜晟馮光熊籌辦軍務

事宜秩然有序均屬鎮靜得宜劉君輔駐紮鎮筰防護城池殲獲賊匪彭廷棟帶兵馳往正大營幫同珠隆阿相機剿賊珠隆阿於攻繞之賊率領將弁兵丁奮勇剿殺傷斃賊匪三百餘人守住營寨蘇靈一到鎮筰卽日帶兵擊賊搶上山梁乘勝剿殺花連布隨同福康安帶領官兵分路殲擒賊匪均爲奮勇出力福康安畢沅和琳姜晟馮光熊劉君輔彭廷棟蘇靈珠隆阿花連布俱著交部議敘其在事守城殺賊著有勞績之文武各員並著福康安等查明咨部分別議敘以示鼓勵○壬辰諭見在貴州銅仁府屬地方苗匪滋擾馮光熊辦理一切軍需事宜尙皆妥協著卽留貴州巡撫之任俾令一手經理其雲南巡撫員缺卽著姚棻調補○諭軍機大臣等據福康安奏督領官兵於二月二十六日分路進攻伐木開柵殺斃賊匪數百燒毀賊寨二十六座並搜獲糧食萬餘石

見在籌勦松桃一帶賊匪卽行前赴鎮筵等語覽奏欣慰其籌辦一切甚合機宜可謂用心之至著賞給福康安珪瑯表一箇及大小荷包奶餅用昭優眷閱圖內正大營迤南報國啞喇各塘地勢最爲險要見已爲官兵攻得其地北之松桃嗅腦一帶尙爲賊匪屯聚道路橋梁被其燒毀掘斷福康安此時自應探明路徑前進先將松桃一帶賊匪全行勦除庶後路廓清方可安心進勦前據和琳奏上月底可抵秀山該處賊匪不少閱圖內秀山與松桃接壤松桃等處道路未通和琳自必將秀山一帶賊匪勦盡肅清後路再赴松桃與福康安併力前進福康安和琳當倍加奮勉以副委任至貴州軍需事宜係馮光熊一手經理尙屬妥協已另降旨將該撫卽留貴州之任其雲南巡撫員缺將姚綏調補著福康安再行酌量如貴州省城有需大員駐紮可暫留姚綏在彼雲南原

有護撫也如貴陽省城別無緊要事件而雲南銅法錢務需人經理卽一面奏聞一面令姚荃徑赴雲南新任○以苗匪滋擾免貴州銅仁府屬松桃正大等處額賦○乙未 上啓懇謁 東陵

西陵○免經過地方本年額賦十分之三○戊戌 上謁 昭西

陵 孝陵 孝東陵 景陵至 孝賢皇后陵奠酒○庚子福康

安奏臣於正大營解圍後進剿嗅腦逆苗見被追賊匪均向岩門寨地所坪一帶奔逸當用火攻將各寨焚燒時風勢正大賊苗囤積火藥經槍礮轟打煙衝徧嶺並將官舟營木城一座燒毀賊卽竄逃追至柳皮寨適總兵花連布等與賊匪數千相持令官兵上前迎擊賊卽驚竄次日花連布等分投進攻共燒賊寨百十餘座時嗅腦城外正有賊苗圍繞攻撲立經官兵殺散該城守備黃上達千總汪連棟聞槍礮聲卽帶領兵丁鄉勇難民出城接應當將

出力兵勇等分別重賞再和琳知臣處帶兵人少將會經隨征臺
灣廓爾喀之都司姜敏功等數員繞路前來協剿亦於是日到營
孫士毅和琳奏黔楚逆苗竄入川境滋擾經都司何元卿等悉力
堵截適重慶鎮總兵袁國璜帶兵趕到添撥各隘守禦臣等於二
月二十七日同抵秀山分路進剿臣和琳由石耶場至梨木場見
苗匪修築木城令官兵迎撲立斃數人該匪向山溝逃匿適穆克
登阿由後路抄住夾攻槍斃苗匪六十餘名臣孫士毅帶同袁國
璜前赴貴道溪見賊數百人正肆焚搶何元卿等馳往手刃數賊
追至王爪屯地方生擒數十人正法諭軍機大臣等正大營嗅腦
等處屯聚賊匪已經福康安先後剿散即可進攻松桃和琳惟當
將秀山一帶賊匪剿捕淨盡卽督兵前往松桃會合攻擊肅清黔
境直趨楚界惟龍團壩地方爲後路門戶賊匪膽敢屯聚多人圖

擾後路實爲可惡今和琳等因見兵止有一千餘名令達音泰等帶兵二百前往堵剿爲數較少和琳等俟川兵續到卽將秀山賊匪剿淨止應帶同穆克登阿前往松桃會合並於後路酌量添撥密爲防守見據觀成奏已帶將弁番兵前往秀山該處竟應令孫士毅與觀成在彼督率兵丁協同防守不可輕率遠離以期保護秀山肅清後路至署參將何元卿於苗匪竄入秀山時率兵丁鄉勇悉力堵截甚屬奮勉著和琳傳旨超等賞給參將銜並賞戴花翎千總馬建紀幫同堵截亦屬出力著以守備升用其孥獲漢奸之知縣路雲瞻等並著和琳於功竣後查明分別送部引見議敘以示獎勵福康安一抵銅仁卽將正大營賊匪立時剿散今又將喫腦苗匪乘勢剿殺解散城圍所辦實屬可嘉著賞給漢玉搬指一箇洋表一箇並大小荷包用昭優眷和琳於抵秀山後卽能剿

殺賊苗茲又派委熟練員弁繞路前赴福康安處以備帶兵之用
實爲用心周密不分畛域深堪嘉獎亦著賞給白玉搬指一箇洋
表一箇並大小荷包孫士毅亦著賞荷包六箇其在喫腦奮力殺
賊之守備黃上達應卽以遊擊超升千總汪連棟卽以守備升用
此時福康安和琳諒已會合將松桃苗匪悉數殲除肅清黔境合
兵一處直趨楚南乘勢攻勦兵威壯盛併力殲擒佇盼大捷喜音
速至再賊匪詭詐多端兼有漢奸煽誘福康安等於進兵時務將
各路嚴密防範毋使乘閒滋擾又福甯劉君輔將鎮筸後路賊苗
勦散盤獲奸匪有欲在城內放火內應之事不敢遣離卽與蘇靈
在城卡稽查防守所慮亦是鎮筸地方關緊緊要賊匪不時窺伺
不可不留心防守福甯等如不能進攻竟應在鎮筸督兵守禦嚴
密稽查俟福康安等知會到日作爲應兵同日進發三路夾攻以

爲一鼓殲擒之計捐職州同滕紹先等急公自效甚屬可嘉著福甯傳旨俱賞給六品職銜俾其益加奮勉再和琳等在秀山盤獲奸匪七十餘人止將緊要應訊之石老唐萬松二名留禁候質餘俱卽行正法所辦甚是著傳諭福甯等如有此等盤獲奸匪照此辦理以免疏脫又畢沅姜晟奏催調官兵卽可到齊蘆溪一路亦已撥兵防守所辦俱妥見在官兵連次得勝賊匪望風潰散想福康安等會兵合剿捷音卽日可至○壬寅諭軍機大臣等和琳奏見飛催前調漢屯各兵到齊先將屯聚賊眾痛加剿殺以清後路酌留弁兵由孫士毅派撥分守營卡旋即調選精銳直抵松桃會剿等語一切運籌布置俱與福康安意見適相符合深中窾要進兵後路最宜防範嚴密自先應廓清賊匪帶兵前進可免後顧之虞惟該處路徑分歧勢不能於所有隘口處所逐一安兵分布轉

致進剿之兵勢形單弱此等後路賊匪自必亦有爲首逆匪占踞要隘止須將其首惡圍聚之處設法殲擒其夥黨自必紛紛潰散和琳等務須熟籌妥辦並遵照昨降諭旨令孫士毅觀成在秀山後路守禦以期放心直前會剿見在福康安已將嗅腦賊苗殺散進攻松桃和琳再帶川兵與福康安會合則聲威更加壯盛自當勢如破竹直趨楚境與福甯合兵夾攻無難一鼓集事其續調屯土官兵並著傳諭觀成迅速催趨到齊以便迅速進剿計和琳此時或已將秀山苗匪悉力剿除與福康安會合一處由松桃進抵楚境將苗匪痛加殲戮亦未可定至後路一帶軍行糧餉均關緊要見據孫士毅奏請留駐秀山就近督辦隨時應付孫士毅惟當留心妥辦以期源源接濟又昨據福康安奏攻殺嗅腦賊匪自高壩坡至桐木寨兵丁乘勢追趕至於刻不服食等語兵丁等奮勇

殺賊甚屬可嘉並著福康安於勦散松桃賊匪後將此次出力兵丁查明各賞給一月錢糧以示獎勵○乙巳諭軍機大臣等據福康安奏於殺散嗅腦賊匪後乘兵威勝勢攻克石城並連夜進兵將旁路後路苗寨岩洞賊匪悉行焚燒痛勦盡數殲除實屬可嘉特解小荷包一箇以賜用昭優眷黔楚苗匪經此番痛加勦殺自已望風膽落其松桃屯聚之賊無難卽日殲除而秀山一帶經和琳屢次勦殺之後又有孫士毅等在彼督兵堵禦賊匪見貴州勦殺利害四川堵捕甚嚴隙無可乘因知湖南兵力單弱止可自守是以思赴保靖永綏一帶冀圖搶占城市爲負隅招致地步福甯等在鎮筵難以望其直前進取福康安和琳久經歷練屢著勞績實爲天賜成功伊二人速將松桃賊匪勦淨後路肅清兩處會合同赴楚境併力攻勦以期一鼓集事其荊州滿兵於登山陟嶺本

非所長停其調派所見亦是至各苗寨中雖有悔懼投出者究非可信諒福康安自能料理妥協斷不爲所誘惑惟拏獲賊匪隴久生據供石柳鄧與石三保係屬叔姪又有吳隴登自稱爲吳三桂之後思復稱王以資號召雖係捏詞煽惑但似此狂悖不法必須將首惡石柳鄧石三保吳隴登等數人按名擒獲盡法懲治此等首惡重犯若俱行解京則該處苗眾未經目擊該犯等備受極刑轉不能觸目警心共知畏懼福康安應將首惡解京刑訊其餘同爲惡之犯竟當留於該處正法以彰國憲而快人心俾各苗民咸知畏懼可以永靖苗疆和琳抵秀山後因苗民在晏農屯聚卽帶領見到之兵督率將弁前往剿殺殲斃賊匪甚多焚毀賊寨亦屬可嘉據稱得有漢屯二千餘名兵力卽當將附近賊匪悉力殲除打通道路與福康安會合追剿並經飛催屯番兵丁星馳前進此

時想已陸續到齊和琳已將秀山賊匪勦散廓清後路與福康安會合一處進臨楚境聲威壯盛自可勢如破竹又據福甯奏劉君輔前赴保靖應援該提督惟當勉力爲之毋稍疏虞看來楚省逆苗尙在鴟張福甯等僅能自守惟當悉力防堵一俟福康安和琳抵楚同德楞泰等帶領官兵併力夾攻以期迅速肅事○丁未上謁 泰陵 泰東陵○戊申福康安奏臣由臬臚進勦奮力追

出山口地勢稍平苗寨無數幾有四千人經官兵殺斃甚多追至青魚塘賊趨松桃官兵分路圍殺淨盡並將松桃城外賊苗窩棚燒毀城內都司孫清元等望見火光帶兵民出城會合進勦闔城難民及堵禦兵勇均已分別給賞諭福康安此次親身督戰調度悉合機宜迅解圍城連次克捷甚屬可嘉福康安著賞戴三眼花翎特昭優異其打仗出力及守城有功之西成尼堪富什渾俱

著賞戴花翎花連布賞剛安巴圖魯名號珠隆阿賞鄂岳起巴圖魯名號都司孫清元著超等以參將用其在事出力員弁並著福康安查明咨部議敘至松桃城內幫護之難民亦著詳查優賞以示獎勵

三月癸丑諭軍機大臣等福康安自抵黔省後連解圍城兵威已振而正大營嗅腦松桃一帶山內多有未經剿淨賊匪亦經探明道路由老虎岩小隴塘等處分路進攻痛加追截殺斃殆盡並將正大營池東與楚省連界之上下岩坳所有賊寨盡行燒毀官兵奮勇實屬可嘉至賊匪於沿途要隘勾斷道路官兵進剿時膽敢持矛放槍抗拒不法已極必當悉數殲除方足以快人心而伸國憲又據奏各路黔苗畏罪歸誠一摺該處苗民因見官兵連勝賊匪奔潰紛紛投營乞命已有六十五寨之多經福康安厚加撫恤

藉可解散賊黨仍不令隨同打仗致有糾連所辦更覺周到至苗民隴保二運糧叩獻情願幫同殺賊頗能效順乃因住寨孤懸回寨後被石三保等糾眾圍繞隴保二被殺身死殊屬可憫著追贈四品職銜並著賞給銀一百兩以爲埋葬之用此案首惡各犯前因吳隴登捏詞煽誘最爲可惡今石三保因良苗投效輒敢糾眾圍繞殺害尤屬不法已極看來黔省苗匪屢經殲戮之後自已望風膽落而湖南逆苗心懷畏懼是以石三保由楚至黔勾結滋擾冀圖牽綴官兵不能直趨楚境今福康安等將黔苗痛加剿戮石三保計無可施自必仍竄回湖南與吳隴登石柳鄧聚集一處妄思抗拒福康安和琳進臨楚省正可督兵搜捕一鼓而擒務須將石三保吳隴登石柳鄧爲首重犯按名生致盡法處治使苗匪知所敬畏其帶兵出力之文武各員并分別加恩並著賞給福康安

銀一萬兩以爲賞需之用卽於黔省軍需項下動支又據劉君輔奏趕赴保靖勦捕苗匪一摺該處新寨一帶俱有賊苗屯聚經劉君輔令副將慶溥等帶兵分路攻擊殺斃賊苗一百餘名所辦尙好慶溥向未經歷行陣竟能將沿途苗寨盡行燒毀甚屬可嘉且係尹繼善之子著賞戴花翎並賞勵勇巴圖魯名號俾其益加威奮至張廷彥前因保靖緊要派令帶兵堵禦惟見屢請添兵並未奮勇殺賊見據劉君輔奏張廷彥已離保靖擬由新寨帶兵進剿是張廷彥轉不在保靖要地悉力堵禦因見劉君輔帶兵前往仗其聲勢率行迎赴前途隨同攻勦實屬不知輕重著福康安查明如果有逗遛懦怯繞路行走情事卽行據實參奏又德楞泰係特派帶兵之員福康安處已有額勒登保帶同巴圖魯前往則德楞泰於劉君輔前赴保靖時目應帶兵同往乃留駐鎮筵惟知坐待

福康安檄調試思鎮軍已有福甯及蘇靈在彼防守豈尙不能堵禦猶待德楞泰幫同固守耶看來德楞泰見賊匪勢重未免心存取巧規避亦著福康安據實查奏○甲寅 上還京師○乙卯諭軍機大臣等川河蓋一帶爲秀山後路和琳出其不意帶兵勦捕所殺賊匪雖尙不及福康安之大加殲戮然該賊經此一番勦殺情形震懾且後路廓清設卡防堵亦不至有乘虛抄襲之慮更可安心前進不料和琳竟能如此著賞大小荷包以示嘉獎至頭起屯練於十五日行抵軍營十六日卽隨同殺賊實爲出力著賞給一月錢糧其續到之屯練降番雖尙未打仗但念近年以來屢經檄調俱各爭先勇往此次復遠道跋涉並著加恩各賞半月錢糧俾伊等倍知感奮於勦賊更爲有益其都司何元卿前已有旨超賞參將銜並賞戴花翎馬建紀以守備升用見據和琳查明該

員等實爲奮勇著交孫士毅遵照前旨遇有缺出卽將該員等先行補用此外如尙有出力之文武員弁亦著和琳查明分別具奏候朕加恩前因秀山與松桃接壤恐苗匪勦散後竄入川省是以諭令和琳就近接印前赴該處豫備防堵不意賊眾四出滋擾蔓延三省今川黔境內雖漸次肅清而湖南賊匪尙未勦除首惡亦未就獲和琳見帶兵前往松桃與福康安會勦所有四川總督印篆該省應辦秋審奏銷及地方一切公務皆須鈐用和琳仍將總督印篆派員送交孫士毅署理孫士毅此時自應留於秀山防範後路並督理糧運馮光熊已仍留貴州之任其糧運臺站一切該撫本當隨時妥辦也至此次福康安所帶係黔省兵丁和琳所帶係川省兵丁一抵湖南境內俱屬客兵但旣會合勦賊無論客兵及本省官兵悉應聽福康安和琳調度派撥庶事權歸一呼應更

豐大功易於告竣又和琳奏黔楚交界從逆之苗無慮數百寨想
不過爲石柳鄧等迫脅所致已發給檄諭詳加開導等語行軍之
際自不得不勦撫兼施以爲解散賊黨之計但福康安前奏訊據
生擒賊匪供稱此次石柳鄧石三保等糾眾起事係爲石滿宜報
復石滿宜係五十二年勾補寨搶劫抗拒匪犯查辦未久又有苗
匪滋擾可見上次辦理未經搜捕淨盡恐數年後又啓釁端況和
琳所奏苗匪肆擾皆在秀山一帶地方其中豈盡係楚苗抑或川
省酉陽一帶苗民亦有與楚苗勾合情事未據確查聲敘明晰閱
和琳前奏圖內秀山所屬十一甲被賊焚搶者竟有七甲如盡係
楚苗闖入川省苗畝何以並不抵禦聽其肆行焚搶看來川省苗
民亦難保無暗中勾結之處和琳當留心防察如川省苗民中亦
有被賊脅惑勾串者並當痛加殲戮事竣後再以次辦理勿留後

患至此次賊匪滋事雖係楚苗石三保起意前往黔省勾結其黨與屯聚亦係楚省較多福康安節次帶兵進剿苗民已知畏懼但貴州苗匪既與楚苗勾結亦不可不詳細根究以防餘孽復萌看來剿捕首惡搜捕餘黨福康安和琳諒所優爲惟善後事宜最關緊要尤宜加意籌畫爲永靖苗疆之計○己未諭福康安和琳奏帶領將弁兵丁痛剿賊匪福康安前經屢降恩旨疊加獎賚並賞三眼花翎和琳初次帶兵於抵秀山後連剿逆匪今復將礮木山黃坡一帶屯聚之賊悉力擊殺攻克木城賊匪望風逃竄實屬可嘉和琳著加恩賞戴雙眼花翎用昭優獎又據福康安奏都司孫清元守備黃上達千總汪連棟把總田中桂等每遇賊匪均能極力勦殺甚爲奮勇孫清元黃上達著加恩賞戴花翎汪連棟田中桂著加恩賞戴藍翎其秀山礮木山一帶打仗實在奮勇出力將

弁並著和琳隨時查明具奏聽候分別加恩至屯練降番屢次調遣實爲奮勇勤勞前已有旨同營兵分別賞給錢糧今著加恩將此次出力兵丁及屯練降番各賞給一月鹽菜口糧以示鼓勵○賜和琳銀五千兩爲賞需之用○庚申以故克勤郡王雅郎阿子恆謹襲爵○乙丑諭軍機大臣等福康安和琳奏川黔兩省官兵剋期會合大獲全勝覽奏實深欣慰又據奏松桃秀山後路甚關緊要見趕緊將各處邊界滋擾楚苗分路剿盡並將投順各苗安置妥協立即赴楚相機辦理所辦正合機宜楚省苗匪尙敢潛赴川黔邊界滋擾而投降苗寨復環列兩省進兵後路自應布置情楚始可安心前進朕雖爲軍務宵旰焦勞然亦不忍加之促迫又據奏石柳鄧見官兵屢次痛剿不敢潛居大塘本寨往依石三保勾合負隅爲苟延殘喘之計前據福康安奏稱石三保在黃瓜寨

吳隴登在鴨保寨已有諭旨令福康安等合兵攻擊次第按剿今石柳鄧既往依石三保若吳隴登亦與石三保聚在一處更屬易辦福康安和琳統率川黔勁兵會合進剿但能破賊所守巢穴生擒石柳鄧石三保吳隴登三犯其餘黨與自必紛紛瓦解惟當察看賊情先至黃瓜寨或鴨保寨賊首屯聚緊要之處合兵攻剿使賊猝不及備爲一鼓殲擒之計轉不必亟赴鎮筵該處有福甯姜晟疎靈等在彼斷不至有他虞卽德榜泰亦止須在蘭里一帶巡查使糧運無虞梗阻福康安和琳更可專力進攻賊巢擒擊首惡剋日蒞功其鎮筵一帶福康安和琳俟剿賊完竣辦理善後事宜再到彼察看撫綏未爲遲也○己巳諭我國家重熙累洽 列聖相承敬 天愛民海內昇平梯航向化朕春秋二十有五御極踐阼初卽拈香叩祈 天恩設能如 聖祖仁皇帝之享祚綿長仰

邀 昊眷克繩 祖武壽祚延洪享國六十年卽當歸政不敢更

冀有所過算今荷 天恩篤祐八旬開五康彊逢吉五代同堂撫

御宸區幸周甲子明歲丙辰卽屆歸政之期大廷授受景運增隆

實爲史冊罕覩惟念諸皇子皇孫以及曾元於子皇帝嗣位以後

一切章服儀制例有一定等差不可僭越但朕爲太上皇帝而皇

子不能照諸皇子皇孫之例遂與宗室等倫於親親之誼似有未

協著於明年歸政後所有諸皇子皇孫以及曾孫元孫仍在上書

房讀書應用冠服韁轡等項俱著仍照見在之例不必更改朕年

登九秩卽可得六世來孫亦當視元孫一例豈不更爲千古未有

之吉祥盛事我子子孫孫續膺統緒儻亦能如朕之享國縣長舉

行歸政典禮爲太上皇者其皇子皇孫等亦如今日朕加恩曾元

輩之服物禮秩照此永以爲法光昭奕禩衍慶徵祥實我大清億

萬斯年之福若無太上皇之稱則當照國家宗室舊例不可僭越
有案成憲用是特頒訓諭交上書房敬謹存記俾我世世子孫知
所稟承以示惇睦而昭法守○庚午諭軍機大臣等楚省苗匪見
經三省大兵會剿何敢潛至川境屢肆滋擾希圖抄截後路並牽
掣大兵奸計可恨據孫士毅奏陣亡鄉勇二名照例分別給賞等
語各處鄉勇能知大義隨同殺賊卽與兵丁無異今因打仗陣亡
情殊可憫著傳諭福康安和琳無論川黔楚三省鄉勇凡有因剿
賊陣亡者俱著查明照官兵之例一體咨部賞卹俾鄉勇等倍知
感奮於剿捕更爲有益連日以來想福康安和琳稍休兵力卽可
前赴楚境併力攻捕諒此烏合苗匪一經川黔勁兵乘勝圍攻無
難立就撲滅又據福甯等奏張廷仲之子張榮炳率領親族跟同
官兵奮勇殺賊甚爲出力等語張廷仲父子旣係真心投誠且能

立功自效自當加恩實收以苗攻苗之益著福甯等傳旨將張廷仲賞給六品頂帶張榮炳給七品頂帶如父子情願在營伍當差張廷仲卽以千總補用張榮炳以把總補用使其感戴恩施倍加出力而此外苗眾聞風歸附賊黨更可不攻自潰又據畢沅奏苗性貪殘客民亦皆狡詐其中不能安分之人相欺日久仇隙日生與其事後而加之懲創不若先事而嚴爲防範等語所言得要此次石柳鄧石三保吳隆登剽取滋事卽因附近客民平日在彼盤占苗產以致日久生隙釀成叛案此等招亂客民不但當驅之回籍更應查明治罪但見值勦捕苗匪之際尙無暇查辦及此事定後著福康安和琳入於善後事宜內會合畢沅悉心妥議逐一清釐毋許客民再與苗民私相往來交易以期永斷葛藤爲綏靖苗疆之計○辛未諭湖南苗匪滋事該省提督等統兵打仗未見痛

殲賊於此次劉君輔等帶兵由古銅溪繞至長潭一帶兩路夾攻賊匪潰逃並派令兵弁豫備攜牌竹筏於水深流急之處乘機飛渡一鼓前進痛加殲戮克復花園辦理尙屬奮勉劉君輔著交部議敘又據奏稱官兵過河時兵丁向洪手持攜牌首先過河卽飛上石卡殺賊一名搶獲礮位該兵丁奮勇可嘉著加恩超補千總所有在事出力將弁著該提督查明咨部議敘其實在出力者另行奏聞再酌量加恩以示獎勵○壬申諭軍機大臣等據福康安等奏卽日攻得土空相機進剿或擄黃瓜寨賊巢或援永綏圍城總期計出萬全等語所想亦是福康安等但當視賊屯聚最多之處先行併力進攻黃瓜寨爲石三保藏匿巢穴前據福康安奏訊之拏獲活賊供稱石柳鄧亦已過河與石三保句合聚在一處福康安等若能攻得黃瓜寨擒獲石柳鄧石三保渠魁旣得餘賊自

同瓦解又據福康安等奏傳旨將各兵丁等賞給一月錢糧看其感戴情形萬分踴躍等語該兵丁等因賞給一月錢糧此次奪卡過河感激奮興爭先出力是用兵之道不可不加之鼓勵茲發去花翎藍翎各二十支著傳諭福康安等此後各將弁兵丁內如有打仗殺賊實在勇往者或應拔補升等換給頂帶或應賞戴花翎藍翎卽一面奏聞一面先行賞給俾伊等知一經出力卽可仰荷恩施自必益加感奮於勦捕尤爲有益○己卯福康安和琳奏臣等進攻土空奪據得拉大山木棚苗匪蜂擁前來官兵從山梁壓下往來衝擊各寨應援賊匪復經額勒登保等分投截殺乘勝直抵牛心山及野牛塘暫紮旋據花連布攻克梁冒寨且戰且前望見永綏廳城臣等卽從葫蘆坪一帶勦殺沿途賊匪分路繼至城內都司吳開泰等及紳士難民出城迎見大兵聲淚俱下當經徧

加撫慰並按照兵民戶口散給糧石仍帶兵至巴茅一帶相機
進剿諭據福康安和琳奏痛剿土空一帶各寨苗匪並迅解永綏
圍城實堪嘉尙福康安和琳著交部議敘所有隨同打仗出力官
兵等著福康安等查明一併咨部議敘永綏被圍日久糧餉幾絕
都司吳開泰等方鼓勵兵民晝夜竭力固守得保無虞洵屬可嘉
可憫吳開泰著加恩以參將升補賞戴花翎千總葛世鳳著以守
備補用其經歷黃沛訓導李烜著賞給五品頂帶事竣後再行送
部引見另降諭旨至永綏城難民等被困日久幫同守城殊堪憐
憫著查明該難民等應納錢糧俱加恩寬免三年其並無田產專
以貿易爲生者著福康安等查明酌量賞給銀兩用示體恤所有
在事出力守城兵丁紳士鄉勇人等仍著福康安等查明具奏另
行獎賞鼓勵又據畢沅奏籌辦糧儲軍火等摺辦理妥協諸凡留

心亦屬可嘉著加恩賞戴花翎以示獎勵○庚辰福康安奏臣由金川帶兵以後凡征勦石峰堡臺灣廓爾喀等處皆賴聖明指授藉著微勞爵秩之隆已超儔列茲因勦辦逆苗復蒙賞戴三眼花翎臣父傳恆曾經賞戴未敢祇領臣謹援例懇辭備未蒙允准仍行敬謹收貯不敢戴用得旨汝此數次功勞實過汝父朕若不格外加恩乃是有私何以爲國家鼓勵朕世臣不可辭該部知道夏四月庚寅孫士毅奏難民王合倫至平塊營投順並將楚匪龍長固設法誘降據該犯供稱首逆吳老巖率領苗匪入寨燒搶脅令順從投爲大頭目因將該犯監禁福甯奏永綏圍城已解飭副將慶溥等嚴守要隘諭軍機大臣等龍長固係屬苗民乃順從苗匪抗拒官兵情殊可惡孫士毅因將來有須該犯質證之處將該犯嚴密監禁此等匪犯此時自不便辦理致阻效順之心但俟事

定後務須從嚴究辦以淨萌蘖又楚民王合倫能將苗匪頭目設法誘致頗爲出力著卽照良苗石老三等之例賞給六品職銜以示鼓勵又據福甯奏永綏圍解一摺殊不知恥福康安和琳一抵楚境卽能連次克捷復將永綏賊匪剿殺福甯在彼日久株守空城毫無展布今尙覲顏爲此奏耶惟所稱乾州保靖均有投誠苗人固不可阻其向化之心亦不可遽爲輕視見飭該鎮將等陽示羈縻陰爲防範等語所慮尙是見在福康安和琳已由永綏乘勝進剿直搗賊巢聲威壯盛福甯惟當奮力自效併力夾攻將首惡等幫同拏獲稍贖前愆勿再仍前一籌莫展致干重咎○召伊勒布來京調田鳳儀爲福建布政使○辛卯諭昨據伍拉納哈當阿等奏臺灣賊匪陳周全等糾眾滋事已有旨令該提督等速往查拏茲又據伍拉納等奏該處漳泉廣東各村莊俱起義民賊匪多

被擒獲餘黨紛紛竄散陳周全等三月十五日攻擾民莊有義民
首楊仲舍許暢舍施邁舍金鋪觀等招集義民二千餘名假意投
入賊夥與賊飲酒出其不意殺死賊匪百餘人將賊首陳周全拏
獲裝入木籠等語覽奏欣悅臺灣自林爽文滋事後大加懲創乃
爲時未久陳周全等復敢聚眾戕官不法已極實屬罪不容誅該
處義民幫同殺賊而義民首楊仲舍等能招集多人誘獲賊首實
屬可嘉之至除楊仲舍等四人交伍拉納等查明照從前義民黃
莫邦郭廷筠等之例超擢官職優加賞資俟事定後送部引見外
所有義民首及義民等查明廣東是何村莊福建是何村莊將本
年應納錢糧均著該督撫詳查分晰住址槩予寬免以示朕嘉惠
善良恩施逾格至意○壬辰以故誠郡王弘暢子永珠襲封貝勒
○癸巳諭朕辦理庶務往往天牖朕衷幾先洞燭本年會試榜發

第一名王以銛係浙江人二名王以銜亦係浙江人朕披閱之下以各直省應試舉子不下數千人豈無真才足拔王以銛王以銜同籍聯名儼然兄弟恰居前列殊覺可疑茲據欽派大臣將覆試各卷分別等進呈第二名王以銜覆試列在二等第四高下尙不相懸其王以銛竟列在二等七十一名朕親加披閱疵類甚多派出大臣校閱甚爲公當且據磨勘大臣奏稱王以銛會試中式之卷第二藝參也魯後比內用一日萬幾一夜四事等字據於先賢身分尤爲引用不切似此膚泛失當之卷何以拔置第一且所擬策題紕繆處甚多該考官等於掄才大典漫不經心殊非慎重衡文之道竇光鼐人本拘迂不曉事體朕夙聞其於時藝一道尙能留心講習是以派爲正考官不意其糊塗錯謬一至於此且初九日主考出闈復命召見時竇光鼐不特奏對不明跪起兼至傾跌

是其年老昏愎豈可復膺風憲之任除副考官劉躍雲瑚圖禮及
薦卷不當之同考官等卽照和珅等所請交部嚴加議處餘著照
所擬分別辦理外寶光肅著卽解任聽候部議所有都察院左都
御史員缺著朱珪補授廣東巡撫員缺一時尙未思得其人朱珪
著暫留巡撫之任其未回京以前著紀昀兼署左都御史事務俟
朕簡放巡撫有人到廣東任朱珪再行來京供職○丁酉諭前因
邪教案內劉之協一犯未獲節經降旨嚴緝至今並未弋獲該犯
居住安徽之太和縣另因竊案關提至豫省之扶溝縣因聞查拏
邪教乘閒竄回本籍又復潛逃是河南安徽兩省地方官吏疏縱
要犯之罪實無可辭見當功令森嚴綱紀肅清之際卽如臺灣逆
匪陳光愛陳光秀陳周全陳光輝等糾眾滋擾戕吏攻城肆惡首
犯尙皆按名擒獲乃劉之協以內地邪教餘犯竟至任其潛逃漏

網尙復成何政體除河南安徽疏縱要犯之該管道府等俟定案後另降諭旨外所有河南安徽兩省之巡撫藩臬於劉之協未獲以前槩不准其支領養廉以示懲儆庶俾激發天良各知愧奮於地方及緝捕事務認真辦理或不至再涉因循用昭小懲大戒至意○諭臺灣奸民陳周全等糾眾滋事一案伍拉納身爲總督一聞匪徒肆擾之信自應卽日渡臺前赴鹿仔港一帶督率辦理據實詳查乃僅派烏蘭保帶兵前去而伍拉納竟在內地安坐並廈門亦不前往節經降旨嚴飭見在逆首陳周全陳光輝等俱經就獲其隨從餘匪亦皆陸續拏獲多名正法是該處此時撫輯居民緝拏餘孽及地方一切應行查辦事件均關緊要本日據伍拉納奏到之摺仍在內地逗遛猶不親身前往是其始終退縮尙復何顏忝膺封疆重寄伍拉納著卽遵旨速赴臺灣查辦一切仍交部

嚴加議處至前據哈當阿奏鹿耳門外有船十餘隻在洋游奕似非商船形狀當卽連放兩礮各船四散等語實不成話在洋游奕船隻旣屬遙望何以知其確非商船卽係賊船若實係商民船隻遽行用礮擊打豈不令商民無故受驚況鹿仔港一帶彼時正當匪徒滋擾之際商船被礮豈不轉疑爲賊匪所擊人心益滋惶惑且果實係賊船正當誘其近岸伏兵擒捕或派兵出洋駛船追剿方爲正辦乃甫經望見卽用礮轟哈當阿之意豈止圖賊船逃散遂可置之不問耶所辦實大錯謬而駐紮彰化查辦一切又復漫無頭緒哈當阿亦著交部嚴加議處並著伍拉納於抵臺灣後遵奉諭旨安撫商民徧行明白曉示俾知奸匪爲法所不貸良善爲恩所必加務令居民安堵商船通行以副朕綏靖海疆軫恤商民至意○戊戌命陝西興安府安康縣屬蔴柳壩滔河移駐都司千

總添撥弁兵○平定廓爾喀紀略成○己亥諭閩省近年以來吏治廢弛已極卽如本日魁倫奏各海口地方盜匪仍復肆行出沒甚至五虎門近在省會而盜船卽在彼停泊疊劫毫無忌憚以致商販聞風裹足皆由該督撫等平日漫無整頓所致其廢弛欺隱較富勒渾雅德爲尤甚伍拉納見在前赴臺灣查拏逆黨餘匪未便遽行更易浦霖著卽來京候旨所有福建巡撫員缺著姚棻調補卽赴新任其姚棻未到之前著魁倫署理巡撫印務江蘭曾任藩司前在山東於曹縣盜案久未完結降補臬司實爲公過念其見在隨同福康安等辦理軍務不辭勞瘁實屬可嘉江蘭著加恩超補雲南巡撫以示嘉獎江蘭惟當倍加奮勉於銅務錢法隨同福康安認真整頓用副委任○諭此次湖南苗匪滋事姜晟辦理軍需一切均屬妥協著加恩賞戴花翎○諭軍機大臣等福康安

和琳攻克榔木陀山梁等處董率官兵冒雨前進且時值霧氣瀰漫對面不見各官兵拔屨越坎而上出其不意痛加擊殺殲賊甚多洵屬可嘉見居天中佳節著賞給福康安和琳節物外並加賞福康安和琳象牙香囊各二箇額勒登保花連布帶兵打仗皆屬奮勇亦各賞給節物一分以示獎勵至賊首計窮力竭希圖乘閒逃竄不可不防朕所慮在此節經諭令福康安等於黔楚要隘嚴密堵截今福康安等奏咨會觀成移赴松桃督率防守所見與朕意相合福康安等當倍加勉力將賊首悉數擒獲迅速集事不可使其漏網又據奏花連布三音庫此次帶兵打仗雖受槍傷幸俱不重此時是否傷已平復殊爲廑念其傷亡弁兵並著福康安等查明咨部加倍議卹○庚子賜王以銜等一百十一人進士及第出身有差○辛丑以陳孝昇爲雲南按察使由糧道遷○癸卯賞會試

薦卷內文理較優之舉人徐斡等三人內閣中書○免貴州官兵

經過地方本年額賦有差○以恭泰爲內閣學士

由詹事遷

○甲辰調

汪志伊爲浙江布政使以陸有仁爲甘肅布政使廣厚爲甘肅按

察使

由陝西潼商道遷

○丙午調宜興爲倉場侍郎僧保住爲刑部右侍

郎○丁未諭錢受椿見有應行待質之處未便令其仍赴廣西新

任西成尼堪巴圖魯見在軍營隨同福康安等辦理軍務及防守

地方頗爲出力前曾均已賞戴花翎所有廣西布政使員缺著西

成補授卽行由驛馳赴新任所遺湖南按察使員缺著尼堪巴圖

魯補授以示獎勵○諭軍機大臣等永綏後路因賊匪滋擾糧運

致有梗塞德楞泰一接稟報卽帶兵親往所辦差強人意川黔大

兵見由榔木陀進剿黃瓜寨賊眾自必在彼抵死據守其分赴長

潭之賊諒亦無多今經福甯畢沅先後派撥兵丁一千名前往應

援德楞泰又馳往催齊各兵相機勦捕想永綏後路自無難廓清軍火兵糧卽可源源前進至賊匪等因見大兵攻克椰木陀山梁滅亡在卽故分遣黨與前赴花園阻截糧運希圖牽掣大兵不得專力擣其巢穴福康安等此時惟當合併進勦攻破黃瓜寨賊巢擒獲首惡其餘自必紛紛潰散不可因花園一帶見有賊匪阻擾糧道伊二人又分投往捕以致兵分見單福康安和琳俱係曉事之人斷不至墮賊奸計但賊首吳老巖石柳鄧石三保吳隴登共有四人福康安等亦宜留心偵聽如賊首四人見俱在黃瓜寨福康安和琳自仍應會合一處儻賊首中止留二三人黃瓜寨據守其一二人率同匪黨在花園一帶肆擾則福康安和琳亦宜酌分一人前赴該處督同勦捕以期首逆速獲剋期蕙功此事總由劉君輔張廷彥安坐永綏花園並不往來巡查致賊匪復敢潛出

窺伺伊二人又不上緊投捕致阻糧運實有應得之咎著福康安等詳查劉君輔張廷彥果有觀望遷延情事當據實嚴參不可稍爲迴護至賊匪將降順苗寨焚燒搶劫實爲罪大惡極將來事竣後必當從重嚴辦其降順各苗尤宜妥爲安撫伊等畏法歸順轉致被賊焚搶不可使之流離失所阻其向化之心將此傳諭知之○戊申諭軍機大臣等黃瓜寨爲逆苗巢穴負嵎固守福康安和琳馳探路徑由閒道用奇密派官兵分路繞道進攻將黃瓜山大梁占據復乘夜進發將黃瓜寨一帶焚燒五十六處將士爭先效命兩晝夜不遺餘力實屬可嘉特賞福康安和琳親佩玲瓏雙魚白玉花囊各一枚並賞五路帶兵之額勒登保等象牙花囊翎管搬指套等件以示嘉獎惟首惡石三保等乘閒免脫未卽生擒殊爲可惜但首惡賊巢已經攻破其賊首已失巢穴雖暫時竄匿不

過如釜底游魂不能遠遁其餘匪黨見其首惡逃散自必人無固志福康安和琳督率官兵就其供出藏匿地方跟蹤搜捕自無難剋期擒獲迅奏膚功至永綏花園一帶楚省糧運未通見藉黔川兩省運糧接濟應令劉君輔遵照前旨迅速帶領官兵將花園隆團一帶屯聚賊匪奮勇剿殺疏通道路俾楚省糧餉軍火源源前進不致缺乏○以周興岱爲禮部右侍郎由內閣學士遷○已酉以福甯惠齡經理湖廣軍務未竣以蘇凌阿仍署兩江總督費滄爲安徽巡撫

五月辛亥朔以富俊爲內閣學士

由內閣侍讀學士遷

○癸丑以祖之望爲

雲南布政使

由山西按察使遷

○甲寅飭禁達爾達木圖等處開金廠○

除西藏三十九族番民每年貢馬銀○丙辰上啓鑒秋獮木蘭

○免經過地方本年額賦十分之三○諭據魁倫查奏閩省近年

洋盜增多由於漳泉被水後糧價昂貴浦霖等辦理不善以致貧民流爲匪黨伍拉納見駐泉州饑民圍繞乞食又伍拉納素性躁急加以錢受椿德泰迎合慫慂辦理各案亦多未協等語上年漳泉二屬偶被水災經朕特降諭旨加倍賞恤寬免秋糧並屢飭該督撫加意撫綏務俾窮黎均霑實惠乃浦霖等並不董率所屬實心經理甚至總督駐紮泉州饑民圍繞乞食尙不認真籌辦又無一字奏聞伍拉納之罪此節尤爲重大殊出情理之外該督見赴臺灣辦事著先行摘去翎頂俟回至內地卽行革職交與魁倫等質審其閩浙總督印務著長麟就近馳驛速往接署長麟未到之前著交魁倫兼署浦霖伊轍布前已有旨解任來京亦著革職如伊等業已自閩起程此時想尙在浙江一帶著交吉慶派員截留解閩以備質訊錢受椿著交軍機大臣行文押帶之員卽由途次

革職拏問迅速小心解往福建勿致疏虞其德泰亦著革職交廣
東督撫將伊拏問派委妥員小心迅速管解前往交魁倫等一併
歸案審辦○丁巳諭昨據奇豐額奏五德在蘇州織造任內辦理
不善以致稅銀虧短一摺業經降旨將奇豐額交部嚴加議處矣
奇豐額前於巴甯阿在兩淮鹽政任內有與商人交結聯宗等事
經朕降旨詢問並不據實具奏朕以其究係巡撫未經與董棒一
律治罪已屬格外施恩今於五德辦理關稅不善一事又復知情
不舉若非朕降旨詢問竟欲始終袒護實屬孤恩溺職斷難復膺
巡撫之任奇豐額著卽革職來京交與軍機大臣究訊所有江蘇
巡撫員缺著費淳調補費淳未到江蘇之前著布政使張誠基暫
行護理惠齡雖有老親但安徽巡撫員缺見在一時不得其人惠
齡著仍留安徽巡撫之任俟簡放有人再行回京侍養以示體恤

○諭福康安和琳奏四月二十三十一等日進剿逆苗攻克蘇麻寨一帶賊巢偏近西梁一摺此次官兵分路進攻攀援險阻不避矢石賊匪據險抗拒潛出滋擾我兵倍加奮勇痛殲賊眾打仗二日一夜未能憩息連克構皮寨清水塘小紅巖大坪山喇耳柳瓦山梁直抵蘇麻賊寨擒拏賊目活賊八十餘名殺賊六七百名焚燒苗寨四十餘處此皆由福康安和琳調度有方將士用命始能痛殲賊眾所向無前且自勦賊以來官兵冒雨進兵備嘗艱苦見在天氣炎歊湖南自必更甚福康安和琳督率官兵等冒暑進攻不辭勞瘁實屬可嘉所奏打仗出力情形幾於不忍披閱福康安和琳俱著交部議敘並著查明出力之侍衛章京鎮將備弁等一體咨部議敘其此次打仗之綠營官兵及屯番等俱著賞給一月錢糧以示朕獎勵勤勞恩加無已至意○諭昨已降旨將伍拉納

革職交魁倫等審辦閩省吏治廢弛已極見在清釐查辦一切正
關緊要非福康安前往不足以資整頓福康安著卽調補閩浙總
督計此時逆苗賊首石三保等當已就擒福康安於拏獲賊首後
著卽馳赴新任伍拉納回至內地聽候魁倫等質訊明確後卽著
派員解送來京交軍機大臣嚴行究訊所有雲貴總督著勒保調
補其陝甘總督員缺著宜縣補授○諭軍機大臣等福康安和琳
屢次董率官兵觸暑進攻至於兩晝一夜不能安憩實在出力可
嘉幾不忍披閱所惜吳半生先由蘇麻寨過大烏草河往上下西
梁未得卽就生擒藏事稍需時日然苗匪寨落想不過如僻小村
莊相距亦必不遠況官兵攻得一處地方則賊匪失去一處巢穴
如此逐層攻圍想吳半生石三保石柳鄧吳隴登窮無所之將必
聚集藏匿更可一鼓成擒除將福康安和琳及在事出力將弁交

部議敘外並加賞福康安和琳小荷包各一箇香袋各三箇額勒
登保德楞泰穆克登阿達音泰綸布春小荷包各一箇以示嘉獎
福康安等當鼓舞弁兵益加勉力務擒首惡捷音到日尙當特沛
恩綸酬庸懋賞至此次福康安等殲賊甚多而官兵無一受傷者
仰賴 上天恩佑事機順利想可剋日成功見在攻克之蘇麻寨

地方總在黃瓜寨鴨保寨左近爲湖南東南一帶方向前此朕方
慮貴州爲石柳鄧起事處所恐其復行竄入勾結煽惑茲軍行所
至漸與鎮筸相近距黔較遠可見賊匪尙無擾截黔省後路情形

此等烏合賊眾屢經官兵殲戮不過東西奔竄以冀苟延殘喘無
難悉數擒獲佇盼捷音速至也○以張曾誼爲山西按察使

由真

莊肇奎爲廣東按察使

由惠湖

○壬戌

上詣熱河

文廟行

禮

上駐蹕避暑山莊○癸亥諭軍機大臣等福康安等奏報官

兵攻克上下西梁等處吳半生雖已受傷又退入猿猴寨狗腦坡
尙未擒獲賊匪屢經官兵痛加殲戮計窮力竭自必展轉竄匿以
冀苟延殘喘然其竄匿之處不過猿猴寨狗腦坡及鴉西鴨保等
處想亦距上下西梁不遠官兵奮勇直進再將各該處巢穴攻破
吳半生更將逃往何處自無難剋期就擒安速集事見在官兵愈
進愈遠該處山深箐密節節可通一切糧餉軍火必須安臺運送
派兵接護防賊抄截諒福康安等心思周到必能籌慮萬全但宜
加倍留心勿致稍有阻礙又據福康安等奏賊匪又糾約花苗節
節抵禦見設法離間用計解散等語所辦亦是黑苗旣知畏懼自
不能再行幫同賊匪抗拒官兵若花苗與之糾結蕆事未免有需
時日自應及早設法以爲解散賊黨之計但黑苗花苗係何種類
石三保石柳鄧商同起事時聞係紅苗但伊二犯究係何種吳半

生又係何苗吳隴登前於辦理句補寨時曾經出力此次石三保等起事時吳隴登初尙不肯從逆因伊子德懋附從該犯父子又係何苗此時福康安等如何設法離閒未據聲明想福康安等離閒之法或於石三保石柳鄧中招致一人或招致吳隴登使之互相擒獻雖亦用兵權宜之計但該犯等狡詐無常且自揣屢次抗拒官兵法所難宥或權時歸附見福康安等防範稍疏又心懷叵測不可不慮著傳諭福康安等如石三保等赴營乞降時務須倍加嚴肅小心防範爲要○甲子諭額勒春僧保住見往新疆換班所有吏部左侍郎員缺諾穆親見署吏部印鑰卽著諾穆親兼署左侍郎其刑部右侍郎員缺目下辦理秋審事務正資熟手刑部尙書侍郎中除胡季堂外亦少諳習刑名之人前因查拏劉之協關繫緊要是以將阿精阿補放河南巡撫今該犯日久未獲是阿

精阿在豫亦屬無益念其由刑部司員出身於刑名自爲練習阿精阿著署理刑部右侍郎並著接奉此旨卽將河南巡撫印篆交與吳璥暫行護理卽行來京供職所有河南巡撫員缺著景安補授景安曾任該省藩司於一切情形素所諳悉伊見往陝西山西審案著俟所辦各案完竣拜發奏摺後卽由該處徑赴新任將地方事件部署妥協秋汎過後再行請旨來京陛見亦不爲遲○丁卯諭見在戶部左右滿侍郎俱已出缺惠齡家有老親著補授戶部右侍郎俾得就近奉侍以示體恤戶部見無滿洲侍郎而錢法堂事務尤關緊要惠齡接奉此旨卽將湖北巡撫印篆交與布政使汪新護理卽行迅速來京供職○戊辰以汪新爲安徽巡撫調祖之望爲湖北布政使以熊枚爲雲南布政使康基田爲江蘇按察使仍幫辦河道事務○辛未諭昨閱國史館進呈于敏中列傳

朕詳加披閱于敏中以大學士在軍機處南書房行走有年乃私
向內監高雲從探問記載又於甘肅監糧一事伊爲之從中主持
愆愆開捐以致釀成捏災冒賑鉅案因此案發覺時于敏中先已
身故不加追究但于敏中簡任綸扉不自檢束既向宦寺交接復
與外省官吏夤緣舞弊卽此二節實屬孤恩非大臣所應有使其
身尙存必當從重治罪今雖已身故若仍令其濫邀世職又將何
以示懲于敏中之孫于德裕見官直隸知府已屬格外加恩所有
承襲輕車都尉世職著卽撤革以爲大臣營私玷職者戒○諭軍
機大臣等據梁肯堂奏查閱營伍一摺內稱閱過提標中左右三
營及昌平密雲順義石塘三屯協潘家口遵化薊州喜峰路山永
協山海路居庸路古北口並入溝唐三營等官兵分別獎賞責革
等語梁肯堂於初九日在古北口送駕回省距今不過旬日提標

中左右三營官兵自可就近在古北口較閱卽如昌平密雲順義等處尙可順道查驗若如喜峰口山海關居庸關等處相距千餘里該督早夜遄程尙恐不及何能逐一較閱況八溝唐三營等處係在熱河東北該督甫經旋省又豈能飛渡出關斷無是理竟成笑話或提督先經閱過該督再行覆閱亦應於摺內詳細聲明該督摺內並未聲敘是該督所稱勤加操演獎賞斥革之處該督既未親履其地則所謂獎賞者何人又斥革者何人不過以想像虛詞將舊存摺彙照樣鈔謄一奏塞責詎知朕日理萬幾於臣工章奏無不詳加披閱豈似該督之漫不經心經目蒙混塞責耶該督卽以爲照例陳奏之件可以含糊聲敘亦應斟酌情形所謂君子可欺以其方難罔以非其道梁肯堂不應若此著傳旨嚴行申飭仍卽據實明白回奏○諭福康安和琳奏官兵分路進剿於重山

驟雨之中將弁兵丁等無不爭先攀陟奮勇窮追連克大小苗寨六十餘處木城四座石卡三十五處殲斃賊苗不可勝計皆由福康安等調度得宜而官兵爭先效命奮勇出力覽奏之下均屬可嘉可憐著賞福康安和琳大小荷包並賞給額勒登保德楞泰穆克登阿達音泰花連布朱射斗諸神保小荷包各二箇其餘帶兵之侍衛章京等除此大業經賞給巴圖魯名號並升等賞翎各員外所有色靈額等二十七人俱著賞給小荷包各一對以示鼓勵至候補遊擊六達色千總王農鄧元富外委萬欽因帶兵殺賊被槍陣亡實爲可惜著福康安等卽咨部優卹所有受傷之千總外委及陣亡兵丁亦卽查明咨部分別賞卹其遊擊王重品旣據福康安查明實係臨陣受傷墜馬身亡亦著加恩照陣亡例咨部給與卹典又據畢沅等奏龍鼻觜等十二寨頭人石兆元等攜帶男

婦五百餘人詣營乞降見飭妥爲安插等語所辦尙是目下首逆未擒凡有投誠苗眾自不得不量予安插以解散賊黨之心但苗性多疑仍當隨時防範勿任反側滋事其隨同剿防之武舉張尙林武生田占魁守備銜張啓坤等均著交與福康安等如查明伊等實在出力亦著體酌量獎賞○撥湖北江西銀一百萬兩解黔備用

六月壬午命惠齡仍署湖北巡撫○庚寅諭軍機大臣等福康安和琳奏官兵攻克沙兜寨等處苗寨一摺內稱連日駐紮大烏草河該處有大山一道地勢險峻苗寨甚多所有鴨保鴉酉天星寨等處遠近山勢約略可見賊匪往來出沒俱於沙兜寨聚集隨督率將備等分路進攻將沙兜盤喇等處寨落悉行攻克等語此次官兵在大烏草河駐紮躡探賊匪俱於沙兜寨聚集密派額勒登

保等分路繞道前進福康安等統領勁旅由正路進攻該處山坡
陡窄險峻異常賊苗築卡守禦官兵圍繞賊寨併力夾攻隨將沙
兇盤喇多喜等處寨落悉行攻克殲斃苗匪無數擒獲活賊多名
實屬出力可嘉又據福甯奏鎮筵一帶賊匪連日前來滋擾該督
與蘇靈密商歸併一處協同防禦殺死苗匪甚眾等語鎮城關緊
緊要連日以來因該處兵力稍單正深慮念今據福甯奏見已固
守無虞與蘇靈合併一處與賊打仗多日晝夜不息亦屬出力可
嘉福康安和琳福甯額勒登保德楞泰達音泰花連布蘇靈俱著
交部議敘其在事出力各員並著福康安等查明一併咨部議敘
所有此次攻克沙兇等寨及鎮筵打仗兵丁俱著賞給一月錢糧
以示獎勵○調聞嘉言爲廣西布政使西成爲四川布政使○戊
子以旱命刑部清理庶獄減徒以下罪承德府如之○辛卯命閩

浙兩省會緝洋盜○乙巳諭留京王大臣會同六部議將各省題奏事件畫一辦理一摺應依議但朕之意不可不明白宣示各省尋常事宜從前原止係照例題報近自一二十年以來各省督撫每將例應具題之件改爲奏摺以便一月之中發摺數次見其辦事認真該督撫旣已奏到朕無不速加批答遂致踵習成風徒滋繁瀆今經王大臣等議歸簡要恐外間無識之徒疑朕批閱憚煩大臣等因而迎合以向來具奏之件大半改爲題咨不知國家創立奏摺原爲關係民瘼並一切緊要事宜而設至於王大臣見改題咨各款皆係無關緊要之件此內如接收交代盤查倉庫無虧等款更爲有名無實各省遇有前後交代及督撫甫經到任時無不相沿具奏僉稱並無虧短乃見在福建一省倉庫空虛已閱多年而該省厯任督撫潘臬等仍以並無虧缺具奏其明驗也可見

此等摺奏不過藉詞搪塞實屬無謂況王大臣等所改題咨各款皆屬尋常按例之件其實係重要急務原仍許其隨時專摺具陳至於題升調補等件向來該督撫具奏尙須敕部覈議迨議覆疏題朕必確加察覈或照該部准駁或照督撫所請施行是權衡悉由朕親裁又何必具奏在先轉致辦理紛歧若謂朕憚於披閱則臨御以來已六十年矣朕敬天勤民維日孜孜迄今已五十九年又過半矣未嘗稍存懈弛見距丙辰歸政之期止餘半年豈五十九年半之久而不敢怠荒而此半年之內轉致稍圖安逸有是理乎卽如朕見因熱河及近畿一帶雨澤稀少宵旰焦勞無時或釋每遇閏章遞到無不親加詳閱是朕於辦理庶務從不肯一刻稍寬不特此也卽明年歸政以後遇有緊要之件尙當指授嗣皇帝率諸大臣等懷遵妥辦俾得聞朕教誡有所稟承仍與今日無異

總之朕仰承 昊眷康彊逢吉一日不至倦勤卽一日務存兢業雖歸政之後亦豈肯置政事於不問此次王大臣等所改題咨各款各省如何遵照辦理之處仍著各該部按照彙奏事件之例於年終彙奏一次其中准駁及有無遲逾之處朕可一覽而知庶刪其煩複而仍綜其大綱於法制更爲周密將此通諭中外知之○諭軍機大臣等前以降苗等或有心懷反側難保其不復萌故智會諭令福康安和琳於擒獲首逆後趁此兵威詳細查辦見在熱河及近畿一帶雨澤稀少業已疊沛恩綸煮賑緩徵減刑肆赦尙未克卽遯渥澤朕夜閒再四思維求其致旱之由而不得因念苗民涵濡王化百有餘年與編氓無異今吳半生石三保等自作不靖糾眾滋擾焚搶抗拒固屬自外生成而其黨與以及附從苗眾究由賊首等勾結迫脅煽惑所致若舉行搜查嚴辦則人數較多

亦非所以仰體 上蒼好生之德目下雨澤愆期朕夙夜省循未
必非此一念所致況首逆旣擒其附從苗眾自必紛紛瓦解若必
逐加查究旣未免按捕需時且恐展轉株連致滋拖累朕心殊覺
惻然著傳諭福康安和琳除吳牛生等四犯首先肆逆罪在不赦
及各處焚搶爲首有名賊目彰明較著者亦當查拏究辦外其餘
被脅苗眾雖經從賊抗拒而畏罪投誠俱可無庸深究總之渠魁
一得脅從可以罔治若謂苗眾心懷反側恐年久又復滋生事端
無難隨時究懲自古本無一勞永逸之策亦不必豫爲逆億以致
殲戮過多有違好生之道況勦撫兼施自更易於蒞事朕盼望甘
澤宵旰靡甯諒福康安等定能善體朕心遵照妥辦以期速奏捷
音罷兵息民仰承恩眷○戊申諭姚瑩見有應訊事件著解任候
質福建巡撫印務仍著魁倫兼署其閩浙總督印務仍著長麟署

理○諭軍機大臣等魁倫參奏姚棻前在漳州道府任內所屬三縣虧空庫項二萬餘兩姚棻著解任交長麟等嚴切訊問據實具奏又據長麟等奏閩省米價平減無須浙米協濟查浙米十萬石見在僅運到六千三百餘石餘米俱請停止等語所有浙江運閩米石及江西撥運之米一體停運行抵何處著卽於何處截留起貯候撥將此並諭陳淮吉慶知之○己酉雨

秋七月辛亥諭鄭親王之名著改烏爾恭阿○癸丑諭軍機大臣等長麟等奏訊問浦霖伊轍布供情一摺內稱周經係伍拉納任藩司時充當庫吏伊轍布任內已經報在外開張銀店常有領出傾銷之項因交代時查出尙有未交銀八萬五千二百兩之數恐新任不肯接收當卽勒追除已見交銀四萬五千二百兩外尙有四萬兩無從措繳恐庫中正項有缺卽將辦賑餘存項下銀四萬

代爲措墊等語看此情形伍拉納之罪更重於浦霖周經以藩司庫吏竟敢在外開張銀店短缺庫銀至八萬五千餘兩之多伍拉納先係福建藩司旋擢閩浙總督每年具奏銀號並無舞弊及接收盤查時何以俱未查出任其虧缺必係周經爲伍拉納私人有通同侵用情弊著傳諭長麟魁倫卽嚴訊周經所短庫銀四萬兩在何處用去儻周經狡梧不吐卽加之刑訊自無難水落石出一經究得伍拉納有從中侵用情節立卽據實具奏儻長麟魁倫意存袒護代爲消弭伊二人自思當得何罪懷之○庚申諭王德奏審擬充沂曹道德明擅發傳單縱容家人陳錦擾累驛站一案將德明擬發伊犁效力贖罪陳錦發往黑龍江給披甲人爲奴所辦大錯國家簡用旗員原欲其正己率屬整飭地方乃德明以滿洲道員因公上省輒敢擅用號馬多帶車輛復縱容家人滋擾

甚至拖累知縣致有自縊之事情節尤重此而不加嚴懲何以儆官常而肅吏治德明著改爲絞監候先於濟南省城重責四十板卽在該省司監收禁俾共知儆惕至陳錦以道員家人倚仗伊主聲勢任意騷擾滋陽縣陳時所發傳單卽係陳錦開條轉給是陳時畏罪自縊實由陳錦釀成且外省陋習督撫司道家人於所屬地方藉官滋事俱在所不免此事因該縣張晉稟出玉德不得不據實參辦而其餘州縣隱忍不報督撫亦遂置若罔聞者諒亦不少必應從重究辦懲一儆百陳錦者卽在該處絞決以抵陳時之命並爲各省督撫司道家人長隨滋事不法者戒署泰安縣知縣張晉據實稟明尙有風力著遵前旨送部引見餘著照所擬完結至玉德辦理此案意存寬縱豈以明年屆朕歸政之期輒敢輕爲嘗試朕仰承 昊眷康強逢吉一日不至倦勤卽一日不敢懈弛

雖歸政後遇有此等事件亦必加意整飭甯肯置之不問且德明不過因公上省並非調任挈眷行走乃既用號馬十餘匹因何復用大車三輛之多其所裝載究屬何物必係私帶苞苴輜重或竟係餽送玉德之物俱未可定玉德何以並不詳查具奏殊屬非是玉德著交部嚴加議處並著將德明車輛所載何物係作何用詳細查明據實具奏如德明所帶係餽送玉德及在省兩司物件玉德隱匿不奏將來別經發覺試思當得何罪懷之慎之至陳時籍隸雲南因被上司累畏罪自盡情尚可憫所有陳時家屬搬送各費俱著玉德出貲給付送令回籍以示罰懲將此通諭知之○丙寅諭據福康安和琳奏貴州提督彭廷棟自駐紮正大營以來統率將弁晝夜巡防不辭勞瘁染患時證猶復力疾在城樓駐紮防守醫藥罔效旋即身故等語彭廷棟於本年苗匪滋事時卽馳

赴正大營衝開賊圍進城堅守屢次打仗殺賊甚爲出力卽染患時證經福康安等屬令前赴銅仁調養而該提督堅意不肯仍復力疾駐守竟在正大營身故實堪憐憫著加恩追贈太子太保並賞銀一千兩俾令料理喪葬其長子著賞給頭品廕生所有餘子等著甘肅總督查明年已長成才具較優者一併送部引見以示軫恤而嘉忠蓋總兵花連布隨同福康安等節次攻解圍城打仗殺賊極爲奮勇出力所有貴州提督員缺卽著花連布補授副將那丹珠此次隨征苗匪亦爲奮勇所有貴州安籠鎮總兵員缺亦著那丹珠補授用示獎勵○諭軍機大臣等官兵見已乘勝渡過大烏草河賊匪無險可恃且與鎮筸一路官兵業經會合賊人不過在猿猴寨及鴉西鴨保一帶竄匿不敢蔓延但鎮筸永綏乾州三廳暨保靖辰谿一帶及四川酉陽貴州銅仁等處在在苗疆道

里縣長苗戶甚多儻必悉數勦辦不特兵力不敷搜捕兼恐餘黨聞知以罪在不赦轉堅其死守之念朕意此時福康安和琳自應遵照續降諭旨於擒獲首逆吳半生等四犯後再將各處焚擄爲首有名賊目查拏懲辦外其餘被脅附和各犯及一聞官兵進剿而卽畏罪乞降者俱可毋庸深究自以殲厥渠魁脅從罔治爲正辦至此次連克賊寨奪過大烏草河皆由福康安和琳調度得宜而在事將弁兵丁亦俱奮勇出力且伊等當此炎風烈日之際不辭勞瘁觸暑進攻實堪嘉獎福康安和琳著各賞大小荷包上用奶餅一匣額勒登保德楞泰花連布那丹珠常明俱各賞給荷包又發去奶餅七匣交與福康安和琳分賞巴圖魯侍衛章京及在事奮勇出眾之鎮將弁兵暨屯練降番等俾得分嘗珍味以示勸勵統俟擒獲首逆大功告成再沛恩綸普加懋賞又據福康安等

奏劬柳苗人見官兵勢大卽拋擲器械乞降道員常明不准所請
仍督率將備併力追擊賊眾紛紛潰竄等語所辦可嘉賊匪經官
兵剿辦之後復臨陣乞降若遽爾允准安知其不懷叵測乘閒狡
逞爲官兵肘腋之患常明不准所請極爲有見伊甫擢道員見又
加恩補放貴州臬司並賞巴圖魯名號仍著福康安和琳傳知各
路帶兵之員遇有此等勦敗賊匪臨陣乞降者俱照常明所辦毋
得率行允准以防反側其常明所遺貴東道員缺著福康安和琳
於隨營出力知府內奏請題補又福康安奏勦殺嚴門賊匪一摺
尙差強人意鎮筵一路蘇靈帶兵較爲出力已降旨賞給巴圖魯
名號並著加賞大小荷包用昭鼓勵又巡檢方相袞因催餉被害
情殊可憫著咨部照知縣之例議卹至孫士毅拏獲奸匪龍六官
董老四龍喬保向老貴四犯俱係爲賊探信之人審明後應卽凌

避處死乃孫士毅僅將該四犯處斬梟示尙覺罪浮於法其拏獲
奸細之將弁俱爲出力遊擊孫起龍著以參將升用千總靳文銓
著以守備升用並給孫士毅大小荷包示獎○諭向來督撫年節
三貢備物呈進朕不過酌量賞收以聯上下之情但伊等所得養
廉原資辦公之用見在每年督撫等尙不免有簋簋不飭私行派
累情事因思明年屆朕歸政前已有旨交軍機大臣存記各督撫
等不得於年例之外另添呈進次數致滋糜費但明年以後慶辰
月分自當不同若分期呈進是又添貢一次矣著傳諭該督撫等
明年止須於嗣皇帝慶辰備物呈進仍原係朕照例觀覽其收與
否與常年相同其八月之貢不必再進以示體恤在各督撫等職
分較大稍知大體自能恪遵朕諭其鹽政織造關差係內務府人
員誠恐伊等私添次數以爲見長地步如此不特踵事增華且失

敬恭之道斷不可行爾等可遇便諭令知之○阿彰阿因病解任

以常明爲貴州按察使

由貴東道遷

○戊辰諭軍機大臣等本日朱珪

奏拏獲海洋盜犯審明辦理二摺已批該部知道矣近日粵省洋

面屢有搶劫之案必當嚴飭文武官兵上緊查拏以靖地方朱珪

署理督篆於捕盜事宜尙能認真辦理惟兩日以來分次遞摺外

省習氣於陳奏事件往往用一差弁齎帶數摺分日呈遞以此見

勤所謂弄巧成拙最爲陋習朱珪係讀書人更不應如此卽如此

次拏獲洋盜之摺關係地方要務卽由驛酌用三百里馬上飛遞

未爲不可何必以差弁分齎見其不輕用驛遞乎朕於臣工功過

其所長必爲嘉獎其錯處亦不肯稍爲假借也除將朱珪交部察

議外將此諭令知之○戊寅以謝啓昆爲山西布政使調張會誼

爲浙江按察使以和明爲山西按察使

由河東道遷

○以全保爲直隸

按察使

由熱河
道遷

八月癸未賜南掌國王召溫猛緬甸國王孟隕敕諭○甲申諭軍機大臣等長麟魁倫奏覆周經供詞一摺太不成話已於原摺內供單內批示抹出矣此事前據長麟等奏到意存將就完事已降旨嚴飭訓示極爲詳盡總之周經不過一微末庫吏不足齒數伍拉納前爲藩司何以令其兼充買辦及爲總督又令其承修衙署若非與之夤緣交通則該省書吏甚多何獨厚於周經凡有便宜出息處所皆交伊一人辦理况周經係伍拉納爲藩司時始充當庫吏其爲伍拉納任用私人已屬顯然乃供單內稱所短庫銀如何能用到伍總督身上非狡飾而何長麟等何以不向嚴詰輒據以入奏且周經前後虧缺庫銀至八萬兩之多除已繳過四萬兩尙少銀四萬兩卽云該犯見開鋪店房產尙估值銀四萬兩但督

撫藩司於到任時及每年年底俱應盤查一次因何並不查出任其那移短少伍拉納伊轍布係前後該管藩司又何以聽其侵用庫項在外違例開設銀號並開鹽店當舖以官帑而爲該犯牟利地步伊轍布復任其拖欠時日不向催促迨不能措繳又暗將辦賑餘項爲之墊補此是何故設非平日有與通同分肥情事豈肯不顧己罪擔此重大干係長麟等何以並無一言訊及君子可欺以其方難罔以非其道此等供詞俱出情理之外何能於朕前嘗試乎長麟魁倫著再傳旨嚴行申飭至魁倫係此案原參之人伍拉納信用錢受椿德泰惟聽伊二人之言又縱容張大本秦爲幹等貪污不職聲名狼藉皆屬魁倫參奏卽周經侵那庫項伊轍布代爲彌補亦係魁倫明白奏出若魁倫不奏朕亦何由而知魁倫旣奏於前自必訪有確據見交伊與長麟會辦何以又不和盤托

出且伊前來各摺尙有指實今乃於周經一節又復意存遷就代爲掩飾實屬進退無據看來此事不好結局實爲長麟魁倫惜之若該署督撫接奉續降之旨不敢迴護前非能審出伊轍布周經侵那庫項並餽送督撫藩司各實情則已若伊等仍欲顛預了事可卽將伊轍布周經迅速解京候朕另派大臣覆審或親加鞫訊沿途並飭小心管解若有畏罪自戕等情必將長麟魁倫照故縱罪囚例寘之重典決不寬貸伊轍布周經到京後若長麟魁倫能保其不復改供固屬甚願儻竟供出通同侵蝕實情伊等自思當得何罪長麟等素知朕辦理庶務其情眞罪當不肯絲毫含混朕非不能辦大獄不敢辦大獄之人該署督撫毋再有意瞻徇致朕不得已而辦大獄也懍之慎之將此由六百里再加緊諭令知之仍著將指出各情節審明亦由六百里加緊迅速回奏朕於此案

必期計日以待若過時不至當另有旨矣○乙酉諭前因德明因公上省何至用大車三輛之多必有裝載餽送物件降旨交王德嚴審茲據奏訊之德明供曾備帶如意朝珠蟒袍等件爲送巡撫司道之用因未經用去見蒙鈔出等語視之駭然督撫如果潔清自矢屏絕苞苴則通省屬員知督撫不收餽遺自無有豫備上省爲餽送之用者茲德明攜有如意等物爲到省送禮之用可見各省餽遺之風並未盡絕特因德明被參未經致送耳此案因朕節降嚴旨查詢該撫不敢隱飾是以據實奏出此外未經破露者自更不少督撫受國家厚恩簡任封圻廉俸優裕理宜潔己率屬何得私受餽遺相習成風殊非肅清吏治之道各省督撫中潔己自愛者不過十之二三而防閑不峻者亦恐不一而足但朕不爲已甚不肯因此徧加嚴查也嗣後各督撫務宜躬飭簠簋砥礪廉隅

以期大法小廉仰副委任儻經此次訓飭之後尙敢相率效尤不自檢束一經發覺必當從重治罪毋謂不教不誡也將此通諭知之○諭軍機大臣等本日玉德奏革職道員德明上省時帶有如意朝珠蟒袍等物爲送巡撫司道之用已降旨通行訓飭矣又德明供內伊前任潞安府時管理鐵廠一年有餘贖銀至五萬兩等語殊堪駭異各省道府缺分較好者於廉俸之外或管理廠務稅課稍得盈餘亦情事之所有然亦不過數千金至萬餘金已極爲優厚乃德明於潞安府管理鐵廠僅止年餘竟贖銀五萬兩之多設在任十年不將有五十萬兩乎若非朘削商民何以得此多貲可見外省道府似此缺分豐腴不知潔己者尙不一而足總由督撫等平時不加稽察任聽暗肥囊橐或將其任用私人題調此等美缺以爲分肥膏潤之地俱所難免卽如德明以巡道上省尙攜

帶禮物像備餽送設美缺如潞安府者其餽送自必更多而該上司等因受其厚賂遂一切置之不問特幸尙未破露朕亦不肯因德明一事徧加嚴查耳但德明既有此供則潞安府一缺亦不可不查明飭禁著傳諭蔣兆奎卽查潞安府鐵廠每年實在出息若干見管知府有無違例多索之處確切查明妥立章程將稅則量爲酌減毋許額外私添浮費俾該管之員略爲霑潤仍不至累及商民方爲妥善並通飭各省督撫等激發天良實心訪察於所屬內遇有似此缺分過優者一體詳查使有限制勿使不肖之員藉端濫取以致飽慾壑而累窮簷此爲最要至此事從前各督撫漫無稽察甚至明知故縱本應徹底根究從重懲治第朕不爲已甚寬其既往然亦豈可不儆其將來朕辦理庶獄一秉大公寬嚴相濟近年以來政刑未免稍寬今外省遂有餽送婪索之事自係寬

之所致不得不糾之以嚴而德明案已敗露不肯緣此逐一追求此則於用嚴之中仍寓之以寬各督撫惟當仰體朕心倍加感惕共勵廉隅也至玉德辦理此案初亦有意寬縱經朕屢加嚴飭始行據實查奏而近日長麟魁倫審辦閩省藩庫那移虧缺一案亦存化大爲小之見屢經嚴旨申飭看來各督撫未免因朕明春卽屆歸政以爲辦理諱案可以顛預遷就輒敢輕爲嘗試殊不知朕綜覈庶務從不任絲毫含混卽嗣位之皇子朝夕敬聆訓誨自亦知所秉承未必肯聽其蒙混或初年莅政未能灼知情僞而朕仰蒙 昊眷精神強固雖歸政之後亦豈肯置天下事於不問彼時督撫等設敢施此伎倆經朕察知更當加倍懲治決不稍爲寬貸也將此諭令各督撫著存記衙中交代時必令面授以誌永久奉行○丁亥諭軍機大臣等福康安和琳此次連日窮追痛剿不分

晝夜且攀陟險阻於崇山峻嶺之間繞道進取往來跋涉不下二三百里之遙備嘗勞勩幾於不忍披閱特親解小荷包二箇分賜福康安和琳以示優眷仍各賞大荷包一對小荷包二對並賞額勒登保德楞泰花連布常明珠隆阿那丹珠豁隆武大小荷包其打仗兵丁及屯番等俱加賞一月錢糧用示獎勵福康安和琳當督率將士倍加奮勉統俟大功告竣再沛恩綸同膺懋賞至福康安等奏見在軍威大振附近苗匪多有長跪山巔乞降並有情願跟隨打仗守卡修路以圖贖罪者此最好之機福康安等暫准降順以分賊勢正宜如此辦理此時首逆已將擒獲其乞降苗眾自應允准以攜其黨與著福康安和琳卽向降附苗眾等傳知以伊等若有將首逆吳半生等生擒獻出不但寬其從前附賊之罪並當另行加恩如此明白宣示降附苗眾等希冀邀恩更可不勞而

集事又據奏副將劉惠駐紮桃映村拏獲賊目吳老華尙爲出力等語見屆用兵之際劉惠旣爲出力自應遇有總兵之缺升用俾知鼓勵如伊升擢總兵之後或不勝專閫之寄屆期不妨再行據實奏明也又據福甯奏被賊戕害武生滕家泰之子滕國祥年已十九語言應對尙爲明白等語滕家泰能知大義被賊慘害情殊可憫其子滕國祥著卽加恩賞給五品頂帶並著福甯傳旨向伊詢問願就文武官職聽其自便○丙申諭劉義奏染患瘡疾日久驟難痊愈請解任在京調理等語劉義歷任內外供職有年著施恩加太子少保銜以原品休致目下天氣涼爽伊復步履艱難卽令回籍調理不必在京等候接駕謝恩以示體恤其兵部尙書員缺著朱珪補授朱珪見留廣東巡撫之任俟簡放有人交代後朱珪再來京供職所有都察院左都御史員缺著金士松補授○丁

酉調胡高望爲吏部侍郎

由兵部調

○己亥

上自避暑山莊回鑾○

乙巳 上還京師○戊申諭常齡奏請嚴禁鐵背尖挑以靖兇徒

一摺據稱粵東地方有一種鐵背尖挑甚爲銳利商販農工相率

製用到處攜行遇有睚眦小忿卽隨手毆刺釀成人命請嚴行禁

止勒限繳官等語所奏殊屬瑣碎此等民間私行製造器具過於

銳利易致傷人釀害常齡見署臬司止須自行嚴禁儻有不遵禁

例仍前私製以致殺傷斃命者卽可隨案懲辦此皆地方官分內

應辦之事又何必瑣屑入告奏請飭禁常齡著傳旨申飭並著通

諭各省督撫等如地方遇有此等應行查禁之處皆當隨時留心

辦理朕日理萬幾於各省陳奏章疏無不親覽豈有憚於披閱但

似此瑣細事件無關緊要不值特行降旨又何必紛紛陳奏徒滋

煩擾卽明頒敕諭各督撫以至州縣官何曾見實力奉行不過貼

數張告諭日久風吹雨溼並告諭而無之朕久爲各督撫羞之不知各督撫羞乎否也

九月辛亥 上御勤政殿召 皇子 皇孫王公大臣入見宣示

恩命立 皇十五子嘉親王 爲皇太子以明年丙辰爲 嗣

皇帝嘉慶元年諭朕寅紹丕基撫綏方夏踐阼之初卽焚香默禱
上天若蒙 眷佑得在位六十年卽當傳位嗣子不敢上同

皇祖紀元六十一載之數其時亦未計及壽登八旬有六也自臨
御以來仰荷 昊蒼垂佑 列聖貽庥寰海昇平重熙累洽御宇
之年慶周甲子敬念維 天維 祖宗所以付託在予者至重且
鉅於繼體授受之際曷敢不倍切兢兢朕前此不卽立儲之由節
經頒發諭旨反復申明蓋以厯觀史冊三代而下由漢迄明儲貳
一建其弊百端前鑒具在朕朝 太祖 太宗 世祖俱未豫立

儲位惟 聖祖仁皇帝曾以嫡立理密親王爲皇太子後竟爲宵小誘惑兼患痼疾不克祇承其時大臣中曾有以國本應行建立陳請者仰蒙 皇祖聖裁獨斷 訓諭特頒不復冊立迨傳位

皇考十三年勵精圖治內外肅清雍正元年 皇考卽親書朕名貯於乾清宮正大光明扁額之上又另書密藏常以自隨朕續紹鴻業六十年間景運龐洪版圖式廓十全紀續五代同堂積慶駢蕃實爲史冊所罕觀此皆仰賴 皇祖 皇考貽謀燕翼用能啓佑後人綏茲多福朕欽承 家法踐阼後亦何嘗不欲立嫡以皇次子爲 孝賢皇后所生曾書其名遵 皇考之例貯於正大光明扁上不意其早年無祿不能承受會同大臣等啓緘閱看贈爲端慧皇太子此中外所共知者嗣於癸巳年冬至 南郊大祀敬以所定嗣位皇子之名禱於 上帝並默禱所定嗣位皇子儻不

克負荷卽降之罰俾臣得另簡元良以爲宗祏延遠無疆之福又於盛京恭謁 祖陵時敬告 太祖 太宗在天之鑒是朕雖不明立儲嗣而於宗祏大計實早爲籌定特不效前代之務虛文而貽後患耳夫建儲一事三代以後建立嫡嗣舊制相沿具載史冊若以此等歷代相踵名正言順之事爲非則朕亦非讀書稽古之人矣設名分未定或致如前史夜半宮中出片紙之語其流弊更不可言方今綱紀肅清宮府一體歷代權奸婦寺諸秕政絕無其事斷不至因儲位未早宣示致滋他慮我子孫果能效法 祖宗及朕之敬 天勤民敕幾親政卽不明詔立儲實可萬年無弊然此言卽朕自問亦不敢自以爲是千萬世後必有以爲非者且令其平心觀我 祖宗及朕所行與國家之得實益政治之享太平與否可耳朕誕膺大寶今六十年矣回念踐阼時默禱 上帝之

語並追憶朕年五旬後曾於 聖母皇太后前奏及歸政之事彼時蒙 聖母諄諭以朕躬膺付託之重天下臣民所繫望卽至六十年亦不當傳位自逸次展朕卽以 聖母所諭默奏 上帝若能長奉 慈甯壽躋頤慶朕亦何敢復執前願乃自丁酉年以來所願旣虛於是仍冀得符初志茲 天恩申錫竟獲周甲紀元壽躋八旬開五精神康健不至倦勤天下臣民以及蒙古王公外藩屬國實皆不願朕之歸政但 天聽維聰朕志先定難以勉順羣情茲以十月朔日頒朔用是諏吉於九月初三吉日御門理事召皇子皇孫王公大臣等將癸巳年所定密緘嗣位皇子之名公同閱看立皇十五子嘉親王 爲皇太子用昭付託定制孟冬朔頒發時憲書其以明年丙辰爲嗣皇帝嘉慶元年俟朕長至齋戒後皇太子卽移居毓慶宮以定儲位皇太子生母令懿皇貴妃著

贈爲 孝儀皇后升祔 奉先殿列 孝賢皇后之次其應行典禮該衙門查照定例具奏皇太子名上一字改書顯字其餘兄弟及近支宗室一輩以及內外章疏皆書本字之永不宜更改清書缺寫一點以示音同字異而便臨文至朕仰承 昊眷康彊逢吉一日不至倦勤卽一日不敢懈弛歸政後凡遇軍國大事及用人行政諸大端豈能置之不問仍當躬親指教嗣皇帝朝夕敬聆訓諭將來知所稟承不至錯失豈非國家天下之大慶至 郊壇宗 社諸祀朕年開九袞於登降拜跪儀節恐精力稍有未充不足以將誠敬自應嗣皇帝親詣行禮部院衙門並各省具題章疏及引見文武官員尋常事件俱由嗣皇帝披閱奏知朕辦理爲朕分勞庶得更遂怡養幸躋期頤勉副天下臣民之望尤所至願見屆歸政之期已近所有冊立皇太子典禮一切虛文俱不必舉行

其明年歸政一切典禮儀文著軍機大臣會同各該衙門敬謹條議以聞將此通諭中外知之○以李潢爲兵部右侍郎

由內閣學士遷

○

壬子 皇太子臣

奏言洪惟我

皇父陛下大德受命久道

化成膺

昊蒼之篤祐纂

列祖之貽庥臨御以來六十年如一

日自敬

天勤民用人行政諸大端以及出入起居發號施令之

間兢兢業業罔有不欽是以紀綱肅清寰海悅豫文懿武鏢時和

歲豐諸福畢臻如響斯應天人訢合曠隆往牒方今

聖壽將躋

九袞履帝位者甲子重周猶復體健勵精孜孜惟日薄海臣民共

知共見臣幸際萬古未有之鴻庥親依

一人在上之慈蔭扑蹈

之懷何可名喻茲者恭誦

詔旨荷沐

恩慈冊立臣爲皇太子

以臣之材質撫衷循省已弗克勝復奉

慈諭將以來年畀政於

臣臣五內戰兢跼蹐彌日竊惟神器之重天下之大

皇父淵默

取裁所以篤念維 天維 祖宗者陳義高而垂訓切臣何敢以
區區之私效前代辭讓具文上瀆 君父之聽顧維臣知識樛昧
雖自幼讀書日侍 慈顏竊識典要但年齒尙少閱事日淺於措
施經緯全體大用夙夜省循斯未能信惴惴焉深以弗克負荷爲
懼况恭逢 皇父八旬衍慶以來仰見 聖壽日高 康強純固
神運萬幾而有餘 慮周羣下所不逮 念徵省歲 給復蠲
租 惠澤及人淪浹肌髓非特寸心愛日之私依戀 椿暉之庇
卽內外大小臣工下逮億兆黎庶屬國藩臣靡不含和吐氣喁喁
焉願長奉 悠久無疆之盛治伏願我 皇父御極延禧 躬攬
庶政上答 天眷俯遂輿情臣旣蒙 恩冊立謹當備位儲官朝
夕侍 膳問安之暇得以稟受 至教勉自策勵敬俟我 皇父
期頤策衍 上儀慶成維時載頒 成命臣敢不敬謹祇承所有

見在改元歸政事宜伏祈 敕停舉行臣悽悽寸誠措詞罔知體
要伏惟 聖慈鑒察俯 賜俞允實深屏營顙懇之至和碩禮親
王臣永恩率王貝勒貝子公內外文武大臣及蒙古王公等奏欽
惟我 皇上治懋登咸化隆熙洽以 聖神文武之至膺位祿名
壽之全 景運龐洪禔福曼羨 八徵念範 十全紀功 五代
同堂 九旬衍慶自繩契以來鋪鴻庥揚偉烈未有若斯之懿錄
隆茂純嘏緝熙者也乃 特頒詔旨定儲位將以來歲丙辰紀元
歸政蓋自我 皇上御宇之初敬念 神器至重默籲 昊慈紀
年周甲不敢上同 聖祖所以懷 貽謀昭 付畀意深典鉅詎
臣等管蠡之見所能窺測萬一竊稽內禪之文前史所載休烈無
聞不足仰方今日惟勲華之盛軌實授受之上儀然帝堯異位七
十三載帝舜三十徵庸三十在位又三十三載始行禪受計年俱

將百有餘歲我 皇上握乾符闡坤珍履 帝位者六旬法 天
行如一日視伊耆應更延光被例有媯尙未逮倦勤而且 莊敬
日強 幾康時救 宵旰勤思政要暑寒念切民依 丹筆批章
彤廷引對 萬幾躬攬而晷刻弗踰四遠周知而精神罔閒惟
天錫 聖主康強逢吉之徵卽啓 聖主億萬無疆之紀 皇
上凝承 寶命動必稽 天今敬迓 天庥允宜久履 天位且
億兆人之心 上帝之心也 皇上閔澤涵濡 湛恩汪濊近自
都屋編氓遠而外藩屬國凡夫含齒戴髮跂行喙息之倫莫不怙
冒如日月瞻依若父母矧臣等渥被 恩慈淪浹肌髓犬馬戀
主之私動於不自知而發於不容已以臣等區區懇款之心合之
薄海內外喁喁萬眾之心益知 天心之保佑申命未有艾也伏
願 皇上寶籙崇璫瑤圖益煥本 至誠悠久之德兆貞元迭啓

之祥增 上壽於期頤輯蕃釐於章部然後精一 傳心以 聖
授 聖紀重光之盛瑞修 太上之鴻儀斯 仁壽之符倍光於
前典聲烈之茂愈播於來茲臣等不揣冒昧謹合詞恭摺額懇仰
乞 皇上俯順羣情卽 賜俞旨臣等不勝依切待 命之至奏
入 上宣諭曰本日皇太子及王貝勒貝子公暨內外文武大臣
蒙古王公等各具摺額請俯順羣情俟朕壽躋期頤再舉行歸政
典禮朕逐加披閱見其情詞懇款實皆出於至誠朕敬念維 天
維 祖宗所以付託在予者至重且鉅臨御以來仰荷 眷佑海
宇乂安康彊逢吉勤求治理惟日孜孜朕亦何敢稍存自暇自逸
之念惟是朕紹承大統踐阼之初卽焚香默禱 上天若蒙 昊
蒼垂佑得在位六十年卽當傳位嗣子不敢上同 皇祖紀元六
十以次增載之數且實未計及歸政之年朕壽當在八旬有六也

迨五旬後甫經念及歲月舒長倍深兢業初不敢以此自必茲幸
天恩申錫竟獲周甲紀元壽躋八旬開五始願克償此皆仰荷
上天篤祐 列祖貽庥躬舉授受上儀實爲曠古所未有用是
特降詔諭冊立皇太子於丙辰年改元歸政今皇太子及宗室蒙
古王公內外大臣以朕八旬衍慶以來精神純固仍請躬攬庶政
皇太子及臣工等日侍禁庭渥承恩眷臚誠籲懇愛戴依戀朕未
嘗不深鑒其誠惻卽天下臣民外藩屬國飲和食德久沐涵濡實
皆不願朕卽歸政但朕齋心默禱之意精誠孚格久荷 昊慈垂
鑒歷數十年如一日今若因羣情依戀勉遂所請則朕初心焚香
告 天之語轉爲不誠是實難以聽許毋庸再行瀆請况朕仰承
天眷純嘏有常一日不至倦勤卽一日不敢懈弛歸政後凡遇
軍國大事卽用人行行政諸大端豈能置之不問仍當敕幾體健躬

親指教嗣皇帝朝夕敬聆訓諭可以知所稟承不致錯失而大小臣工恪恭盡職亦可謹慎遵循迨朕壽臻頤慶之後優游無爲豈不更爲亙古未有之盛事將來嗣皇帝紹膺大統若能如朕之敬

天愛民勵精圖治景祚綿長上躋耆壽亦如朕之舉行歸政明彰典禮大廷授受尤爲我國家億萬年無疆之祿此則朕所至願也除本日而諭皇太子皇子皇孫及王公大臣外將此再行通諭中外知之○癸丑諭舊例在京王大臣及督撫等每逢年節備物呈進酌量賞收原以聯上下之情來歲丙辰屆朕歸政爲太上皇若於年例之外添備一分呈進皇帝則伊等所得廉俸或不敷辦公且恐外省督撫致有藉端私行派累之事若止備進一分伊等於心又有未安國家百年昇平大內備貯陳設物件甚多原可無須再行呈進徒滋糜費著自丙辰年爲始內外大臣所有年節三

貢竟無庸備物呈進惟元旦及朕與嗣皇帝壽辰慶節在朝王大臣亦止須備進如意以迓吉祥而伸忱悃逾日仍不過分賜眾人也至各省土貢及鹽政織造關差年例辦進物件如果品茶葉之類係備頒賞之用應仍照向例次數備進一分不得復有增添別物內外大臣職任部院封圻惟當恪共盡職勉思報稱原不在備物抒誠嗣後務須仰體訓諭遵照辦理如有仍前備物瀆進者必當交部議處將此通諭知之○以成德爲戶部侍郎由左副都御史遷○甲寅諭皇太子恭謁 兩陵所有拜位應在琉璃門內石五供南安設拜褥行禮恭祭 太廟 奉先殿拜位應在殿門檻外階上安設拜褥行禮其拜褥俱用金黃色○軍機大臣等議奏 皇太子應行儀制一 皇太子每十日率皇子皇孫恭請 聖安一次一 皇太子行走在諸皇子前坐次 皇太子正位諸皇子旁坐

凡遇令節及 皇太子慶日諸皇子於 皇太子前行三叩禮在
上書房俱如家人常禮皇孫至皇元孫悉照見行之禮一宗室王
貝勒貝子公等遇令節及 皇太子慶日行六叩禮一 皇太子
福晉應請旨立爲 皇太子妃班次在諸皇子福晉前 皇太子
妃在內廷主位前俱與常禮同公主諸皇子福晉見 皇太子妃
與諸皇子見 皇太子禮同 皇太子之子行走在諸皇孫前
皇太子之女行走在諸皇孫女前一 皇太子移居毓慶宮日及
皇太子慶日王大臣官員等俱蟒袍補服齊集前星門行禮毋
庸具牋其外省督撫提鎮亦俱毋庸牋賀一 皇太子移居毓慶
宮後於前星門派散秩大臣一員率領侍衛班領一員侍衛十員
更番上直未經移居以前住居三所卽照此值宿一 皇太子禮
服奉旨俱用金黃不必更改冠帶亦著照舊理合遵照一會典內

載有 皇太子儀仗見遵諭旨冊立典禮既未舉行其儀仗亦無庸製備謹擬 皇太子出入內朝於見例所有導從侍衛二員外酌定再行加添二員並隨班輪派乾清門侍衛二員導從出入如出外朝及城市內外除例隨散秩大臣一員侍衛十員外添派乾清門侍衛四員領侍衛內大臣一員帶領前設虎槍三對後設豹尾槍八桿並令步軍統領衙門飭屬略加除避一 皇太子妃所乘車亦用金黃色凡進城出城與內庭主位同行一 皇太子暨皇太子妃應得月費飯食分例等項均照見在諸皇子皇子福晉應得分例加倍支領又奏 皇太子恭謁 兩陵諏吉於本月十二日啓程二十六日回京乘用車轎遵旨俱用金黃色轎夫四人於奉旨派出領侍衛內大臣內諳達隨往外擬派禮部堂官一員護軍統領一員總管內務府大臣一員散秩大臣二員詹事府

堂官一員乾清門侍衛四員前設虎槍三對後設豹尾槍八桿共
用侍衛三十員其內務府武備院上駟院及茶膳房各該處應行
派往隨從官員兵丁請照皇子向例增添至該地方官迎送豫備
之處遵旨查照雍正八年和親王赴闕里告祭之例行知直隸總
督遵辦報聞○乙卯諭軍機大臣等長麟等奏福建鹽務有湊送
經費一款自乾隆四十四年起歷任總督收受銀二萬兩至五萬
兩不等伍拉納任內共收過銀十五萬兩巡撫浦霖於五十七年
索銀二萬兩均係接引攤派等語如何果不出朕所料此事前據
長麟等奏到朕卽以伍拉納浦霖若無通同分肥情事豈肯代人
擔此重大干係乃該署督撫意存將就一味顛預並不切實根究
儻非朕疊次降旨嚴飭長麟魁倫竟思卸罪於周經將該犯正法
滅口而伍拉納浦霖惟自認糊塗失察遂可了事有是理乎試思

朕爲何如主長麟魁倫輒敢以此等伎倆巧爲嘗試今既查出伍拉納得受經費十五萬兩之多而浦霖亦得銀二萬兩該署督撫前此未經究明顯係有意瞻徇罪無可辭乃本日摺內並無一字引咎尤屬非是况伍拉納浦霖身任封圻得受賕私至於累萬責出情理之外俟審明從重辦理見已另派大臣及傳諭吉慶將伊家財嚴密查鈔其任所貲財該署督撫何以未經查辦種種疏漏實不可解長麟魁倫著再傳旨嚴行申飭並將伊二人從前因何未經查出及此次何以未自請罪之處據實明白回奏仍覆訊周經以期水落石出勿再支飾及有不實不盡致干重戾又據另摺奏訪聞漳州府屬民人薛林二姓械鬪傷斃林苗等一案五十九年五月閒解省臬司發交首府審訊尙非正兇錢受椿並不親提究審輒向督撫商同換卷並將人犯發回以致前後監斃十命等

語閩省民風剽悍遇有械鬪頂兇重案該司自應親提嚴訊秉公定擬以儆刁風錢受椿何以並不親訊私行換卷遽將人犯發回以致監斃多命而該督撫又何以聽從錢受椿准其抽換可見錢受椿爲伍拉納等私人隨同弊混情節顯然此案必有聽受賄屬等事並著長麟等卽將該府全士潮知縣顧揆一併革職提同案證詳細研鞫務將錢受椿如何有意消弭串同伍拉納浦霖私換案卷玩視民命之處徹底究明從重定擬具奏將此由六百里諭令知之仍著速行回奏○丙辰諭昨據長麟等奏查富勒渾前在閩浙總督任內亦曾索取鹽商等銀五萬五千兩等語富勒渾身爲總督乃向鹽商等索取銀兩甚屬不堪理應從重治罪若仍令伊在家安居太覺微倖但富勒渾家產業經查鈔且已年老著加恩發往熱河效力贖罪卽令起程前往○諭軍機大臣等昨據長

麟等參奏錢受椿於漳州民人薛林二姓械鬪斃命一案私向伍拉納浦霖抽換案卷以致監斃十命一案已降旨將府縣革職交長麟等徹底究訊從重定擬矣此案係上年四月間之事該府縣於上年五月獲犯解省既經審明並非正兇卽應一面將人犯分別保釋一面另緝正犯並將承審不實之府縣揭報請參錢受椿係好事取巧之人如果伊秉公揭參朕必加之嘉獎何以轉爲抽換案卷致要案延閣年餘之久監斃十命之多此必該府縣有賄求錢受椿情事否則錢受椿平日與該府縣有夤緣交結之處以致爲其所制不得不爲擔此干係舞弊情節顯然再此案前後監斃十命該府縣斷無不稟報臬司之理錢受椿旣向伍拉納浦霖代爲抽卷亦斷無不告知伊二人之理著再傳諭長麟等卽將指出各情節提訊錢受椿令其據實供吐並將正犯是否緝獲之處

迅速具奏勿再迴護致干咎戾本日伍拉納浦霖解到當交軍機大臣會同刑部審訊其得受鹽務銀兩抽換案卷及虧空廢弛等款業據供認惟於平日如何與屬員通同染指之處尙未盡情吐露伊二人身任封疆得受陋規至於累萬種種罪案按律已難末減雖伊等在任自不免有分肥害涸情弊此時續行查出於其罪亦無可加即使一時未能得實其罪亦無可減昨據長麟魁倫奏見仍悉心根究另行具奏等語著傳諭長麟等一經審出務卽仍六百里速奏能於定擬之前趕到以便交軍機大臣等一併訊明覈辦不得因伍拉納等罪名已定遂爾存意爲消弭將就了事之見也慎之○丁巳諭據長麟等奏查出雅德前在閩浙總督任內曾向鹽商索銀四萬五千兩等語雅德身爲總督乃向鹽商索取銀兩殊屬不堪今不將伊補行正法卽係格外之恩若仍令伊在

新疆要任辦理事務不足以示儆戒著新調之員卽赴該處傳旨將雅德革職發往伊犁自備資斧效力贖罪○己未 上閱健銳營兵○諭朕紹膺大寶踐阼之初卽焚香默禱 上天若得在位六十年當歸政嗣子不敢上同 皇祖紀年以次增載之數茲仰沐 昊慈克符初願因十月朔日例應頒時憲書特於九月初三吉日宣立皇太子用昭付託朕前此不立儲嗣之由節經降旨申明至爲詳盡夫建儲立嫡三代以下無不遵行朕讀書稽古豈於此名正言順之事輕議其非昔我 聖祖仁皇帝曾以嫡立理密親王爲皇太子並特選正人輔導如湯斌徐元夢皆係公正大臣非不盡心匡弼乃竟爲宵小誘惑不能恪共子職終致廢斥後遂不復冊立夫以堯舜之聖而有丹朱商均之子可見氣稟不齊卽聖君而兼嚴父日以敬天法祖勤政愛民面命耳提亦難期其遷

善改過孟子所謂父子之間不責善蓋實有見於此何況一二輔
翊之臣安能格其非心變化氣質乎是則繼體象賢惟賴天心眷
佑篤生哲嗣及嗣子之能承受與否耳朕自卽位後亦何嘗不欲
立嫡嗣初以皇次子爲 孝賢皇后所生循照雍正初年 皇考
親書朕名緘貯乾清宮正大光明扁上之例亦將其名親書密緘
扁上不意其早年無祿會同大臣等啓緘閱看贈爲端慧皇太子
復以皇七子亦係 孝賢皇后所生原擬書名緘貯因其年未長
成遲而未果旋亦早世嗣於癸巳年 南郊大祀敬以所定嗣位
皇子之名禱於 上帝並於盛京恭謁 祖陵時敬告 太祖
太宗在天之鑒是朕雖不明立儲嗣而於宗祏大計實早爲籌定
特不效前代之豫行冊立務虛名而無實益耳今荷 天恩申錫
周甲紀元壽躋八旬開五計丙辰歸政不過數月始將密緘嗣子

之名召對皇子皇孫王公大臣等公同閱看宣布諭旨明示中外
來歲大廷親授錫慶延釐實從來史冊所未有若未經頒旨以前
設臣工中或有建議立儲者其人必非真懷忠愛不過託爲謠論
陽附正人君子之列實則冀徼後福陰爲貨緣干進之階非爲名
卽爲利而名利兩收終歸爲利者多似此勢言亂政之人自當立
予重辟然國家儲副極非小事彼旣託爲正言而抵之罪究非美
舉今朕躬行上儀親爲付畀中外翕然臚歡交慶皇太子體度端
凝仁孝夙著克肩負荷新正授受之間實爲盡善盡美天下後世
公論以朕爲戀位乎不戀位乎設朕於此稍有不欲歸政之心又
何妨不行此典且皇太子及內外大臣皆具摺額請至期願始行
歸政情詞懇摯出於至誠朕亦何難俯俞所請乃朕於御極初年
卽以紀年六十傳位嗣子之意齎心默禱近年屢於諭旨內諄諄

述及是朕顙 天歸政之語不肯繫戀天位之心 上帝鑒之天下臣民亦無不共見之今賴 昊蒼默佑諸吉備臻欣慶之餘竇深欽感回念 聖祖大漸授位 皇考其時係內大臣隆科多宣傳 願命逮 皇考傳位朕躬宣示密緘倉卒之際朕不敢自行啓封召同大學士鄂爾泰張廷玉當面展緘敬閱茲朕躬享太平懋膺多福明頒詔旨親御殿廷付授神器以今視昔吉祥善事孰適於此此實 上天保佑申命有加無已之洪貺朕今壽開九袞精神康健視聽未衰若來歲歸政還思自暇自逸竟置天下重務於不問則非所以敬承 天眷亦非御極初年定期歸政不肯戀位之初心矣夫天下至大神器至重儲副之寄運祚所關方今綱紀肅清外無攬權怙勢之臣內無婦寺偏寵之事朕親裁庶政鉅細無遺宮中府中皆爲一體雖不明詔立儲實無絲毫流弊若如

前代權奸柄國文謁公行黨援門戶批政百端而書生迂見惟斷
斷然爭持國本之論甚至君臣父子不免猜疑如前史所載唐宣
宗時裴休請立太子帝云若立太子則朕遂爲閒人宋太宗因太
子廟見還宮都人擁道喜躍帝聞之不懌曰人心遽屬太子欲置
我於何地又明神宗因挺擊一事召文武諸臣責以離間父子因
執太子手謂諸臣曰此兒極孝朕極愛惜使朕有別意何不早更
置等語此由唐宋諸君繫戀天位以神器爲私靳而不予而明神
宗又因內寵固結覬覦非分以致盈廷聚訟骨肉生嫌前事具在
可爲殷鑒我朝家法相承乾綱獨斷惟期慎簡元良從不稍存私
愛而朕紹承統緒首以付託得人爲重無一毫繫戀天位之心無
一息非疑承 帝命之念用能默通呼吸感召庶嘉實朕御極以
來六十年如一日也總之儲貳一建其弊叢生不特僉王依附易

啓嫌隙而名分早著日久必致流於驕佚而不自知我國家不明
詔立儲燕翼 貽謀慮至深遠卽職名密貯務當慎之又慎不可
豫爲宣露如朕見在舉行歸政亦必俟爲期至近始行頒旨宣示
此實萬年無弊之法我世世子孫若能敬效 祖宗及朕之用人
行政於以欽承 昊眷祗迓 鴻庥亦如朕之躬躋上壽再立太
子踵行歸政典禮禔福延洪用昭億萬禔無疆之慶此則朕所深
望於方來者也特將辦理緣由再行申諭此旨著於上書房內閣
軍機處各鈔錄一通敬謹存記永爲法守○諭湖南貴州等處苗
民踐土食毛涵濡德化百有餘年久與編氓無異朕臨御六十年
來撫綏中外一視同仁從無欲將苗眾盡行改土歸流之憲大臣
中從未有條陳及此卽該省官員到京陛見朕亦從未詢及前此
句補寨苗民石滿宜搶劫抗拒一案亦止殲誅首惡並未將其黨

與概行查辦少有株連此次吳半生吳隴登石柳鄧石三保糾眾滋事肆行不法延及貴州銅仁四川秀山地界福康安和琳係該省總督原應前往查究並無貪功喜事之心乃逆苗督不畏死見大兵前往搜捕尙敢負隅抗拒傷害平民及良苗等甚至因鄉勇義民幫助官兵焚其廬舍剝皮慘害罪大惡極實爲覆載所不容此而不大加懲創其何以安良善而儆兇頑此事初起時福康安遠駐滇南一經得信不待朕旨卽兼程馳往督辦和琳甫由衛藏回至邛州亦卽馳至秀山會勦該處深林密箐路徑險阻大半步行兼以霖雨連縣氣候蒸熱福康安和琳不解勞動親帶官兵鼓勇直前所向克捷焚燒木柵占奪石城殲戮苗眾不可勝計實屬奮勇可嘉本欲俟大功告竣渥沛恩施今據福康安和琳奏官兵進勦茶它柳分等處苗寨痛殲賊眾苗匪紛紛乞降者已有七十

餘寨見在勦撫兼施擒捕首逆等語看來首逆勢窮力蹙已如釜底游魚無難一鼓悉擒指日膚功迅奏福康安和琳運籌布置悉合機宜冒險進攻勤勞備著應卽加恩優獎國家定制獎勵勲臣若非宗室皆不過五等之封惟國初額駙揚古利曾以殊勲追贈王爵福康安前經出師金川及平定石峰堡臺灣廓爾喀屢著勲績已節次晉封至一等忠銳嘉勇公此次督勦苗匪又復勤奮出力業經賞戴三眼花翎福康安著加恩仍帶榮賞四字佳號晉封貝子爵銜卽照宗室貝子之例所有護衛官員聽其自將家人揀放此乃逾格施恩俾異姓暨臣得邀殊寵將來我八旗大臣有似此超眾宣勞者均可援以爲例豈非國家世臣之福和琳前歲在廓爾喀董辦軍需諸凡妥協彼時設非和琳沿途催趨竭力轉輸福康安幾不能由濟隴直入廓爾喀之境此次又帶兵勦捕攻克

礮木山梁肅清後路與福康安合兵長驅深入前經賞戴雙眼花翎和琳著封爲一等宣勇伯用昭酬庸懋賞其帶兵出力之額勒登保德楞泰等著福康安和琳查明勞績分別具奏俟奏到日再降恩諭此次打仗兵丁及屯番各兵俱著賞一月錢糧所調廣西兵丁見據畢沅等奏於九月初三日已全抵辰州行走迅速雖未接仗亦屬奮勉並著賞給一月錢糧以示鼓勵再該處連遇秋霖兼有重霧據和珅奏福康安等於發遣回子內訪覓能求晴散霧者令其虔誠祈禱旋即開霽並著查明寬其前罪仍加賞賚事定後准其釋放回籍目下大兵雲集賊眾瓦解逆首窮鼠無歸看此光景若非其黨與自行擒獻卽被官兵俘獲成功已在旦夕福康安和琳務宜倍加感奮督率將弁擒獲逆首剋期奏捷以副朕格外加恩慶成行賞至意○庚申 上命 皇太子恭謁 東陵

西陵○諭軍機大臣等松筠等奏廓爾喀貢使到藏起程一摺內稱巴都爾薩野住廟焚修所有部落中事務俱係該王拉特納巴都爾自行管理等語此等邊徼外藩歸誠向化天朝懷柔體統不過示以剿撫至其部落中事務作何辦理原無事深求已於摺內批示嗣後松筠等止可行所無事不必過問也將此諭令知之○以阮元爲內閣學士

由詹事遷

○壬戌諭劉戡前因染患瘡疾奏請解

任朕以其歷任內外供職有年特加宮銜准其回籍調理以示眷注茲聞溘逝殊爲軫惜所有應得卹典著該部察例具奏尋子祭葬諡恪簡○諭蘇凌阿奏審明遊擊楊天相外委沈春發妄拏張茅等商船捏報獲盜將楊天相發伊犁充當苦差沈春發林朝相發邊遠充軍一摺所辦殊屬輕縱此案前據蘇凌阿奏審訊張茅等實係福建詔安縣人向在上海等處販運貨物有船照腰牌可

憑遊擊楊天相等既不查驗船照又不訊問口供輒裝點情節具報冀圖邀功殊出情理之外蘇凌阿能細心研鞠據實不反甚屬可嘉特降旨將楊天相等革職拏問交蘇凌阿嚴審定擬具奏今蘇凌阿既經訊明楊天相等妄拏邀功捏詞稟報屬實自應從重定擬以儆欺飾而安良善何得僅照故入人死罪未決及誣良爲盜之例加等問擬遣戍將弁巡洋遇有形迹可疑之船白應細加盤詰如果來歷不明方可拏送地方官究訊今楊天相等並不查訊明切輒將無辜之人妄拏誣指爲盜又裝點情節稟報上司冀圖邀功若非該署督究出實情則此案十二命必皆併首就戮幾致良善平民沈冤莫辨而蘇凌阿尙以楊天相等因緝犯無獲起意邀功並以查問之時不懂福建語音率據楊天相等供詞入奏試思洋盜重案必須悉心查詢方可得實豈有因他省之人語言

不懂必須覓一能作通事之人方可究問明白否則不問虛實遽指爲盜有是理乎况該處海口居民甚多張茅等常至該處貿易豈竟無一通曉福建語音之人且據奏稱拏獲住船幼孩四名問係上海縣人何難向其詰訊卽云福建語音不能通曉但伊等既係運販貨物必有登載帳目之人十二人中豈竟無一能識字者何以楊天相等並不令將來歷書寫明白又况張茅等明有詔安縣執照腰牌何得槩置不問遽行拏解是該將弁等竟係有心誣拏希圖地方官不加確訊亦卽作爲洋盜恭請王命正法無可對證得爲伊等邀功地步此等巧詐情節楊天相等可以欺蘇凌阿而蘇凌阿豈能欺朕乃引照已決未決之例思欲顛預混過實屬寬縱楊天相以三品營員幾致十二命含冤屈死情節甚重著交軍機大臣會同刑部另行加重改擬速奏至陳大用係提督大員

緝拏洋盜是其專責乃於張茅等十二名解到時並不略訊供情輒以不懂福建語音率行發縣收監竟係明知楊天相等所報情形未確欲藉此入告以爲見長地步實屬有心取巧總兵元九敘專轄水師楊天相等係先報該鎮乃並不訊明實在情節其船照腰牌又不逐一查驗卽據文轉報致張茅等十二命幾罹重辟卽指出不令書寫供詞緊要關鍵在營員等或圖邀功不肯認真研訊伊二人係專閫大員豈竟見不到此其知情取巧已屬顯然僅予革職不足蔽辜陳大用元九敘亦著一併另行定擬具奏至蘇凌阿審擬此案種種疏漏寬縱而於訊取楊天相供詞內總以不懂福建話語爲之開脫卽朕指出因何不令其自寫親供一節蘇凌阿久任刑名豈得諉爲疏忽看來蘇凌阿辦理此事又如魁倫查辦福建虧空一案以業經參奏於前又思欲作好人將就於後

本應交部治罪姑念此案究係該署督審出實情得以平反著交部嚴加議處仍著傳旨嚴行申飭該州縣審辦此案於張茅身上查出船照腰牌經蘇凌阿向其詢問卽據實稟明得以究出捏報情節尙屬留心不但無過仍著交部議敘朕辦理庶獄一秉大公至正於人命案件悉皆準情酌理遇有一綫可原者無不詳慎矜恤惟恐稍有屈抑見屆歸政之期已近豈肯有意立威故從嚴刻今楊天相等誣害善良幾致冤戮多命此而不嚴示懲創何以明刑弼教况朕仰承 昊蒼洪貺精神強固不至倦勤一日莅乎其位卽一日不敢懈弛事無鉅細無不躬親披覽權衡至當歸政後亦豈肯置天下事於不問朕若稍存自暇自逸之見卽非所以仰副 昊慈內外大小臣工儻因朕歸政在卽於承辦事件意存怠玩希圖含混卽屬孤負朕恩斷不能曲爲寬貸也將此通諭知之

尋軍機大臣等議已革遊擊楊天相應改依官司故入人斬決罪
例擬斬立決卽行正法已革外委沈春發把總林朝相隨同誣拏
報解應於楊天相斬決罪上量減擬絞監候入於本年秋審情實
辦理陳大用元九敘知情取巧應請於海口各枷號三箇月發往
伊犁充當苦差得旨楊天相相依擬應斬著卽於海口正法示眾沈
春發林朝相俱依擬應絞著監候秋後處決餘依議○以台布爲
工部侍郎由內閣學士遷○癸亥 皇太子奉 上命恭謁 昭西陵

孝陵 孝東陵 景陵 孝賢皇后 孝儀皇后陵詣 端慧皇

太子園寢行禮○丙寅調奎舒爲理藩院左侍郎以特克慎爲戶

部右侍郎○辛未 皇太子奉 上命恭謁 泰陵 泰東陵行

禮○以奉天山西四川湖南貴州廣西向無積欠免本年徵賦十
分之二○丙子諭本日皇太子率同王大臣等具奏恭進乾隆六

十一年時憲書豫備內庭頒賞之用一摺覽奏具見惻忱朕登極
初元卽籲懇 昊慈臨御至六十年不敢上同 皇祖以次增載
之數因定例孟冬頒發來年時憲書特明頒諭旨建立皇太子以
明歲丙辰爲嘉慶元年舉行歸政典禮此實朕祇迓 天庥敬繩
祖武之念數十年如一日屢經降旨明白宣示茲皇太子及王
大臣等以朕歸政改元爲曠古未有之盛典雖見在頒朔以嘉慶
紀年而宮廷之內若亦一體循用新朔於心實有所未安特進獻
乾隆六十一年時憲書臚詞籲懇出於至誠朕已俯從所請用備
頒賞內庭皇子皇孫及曾元輩並親近王大臣等俾得遂其愛戴
之忱其分頒各直省外藩仍用嘉慶元年時憲書以符定制因思
來歲歸政朕爲太上皇帝厯稽前典有上尊號之文殊屬無謂太
上皇帝非若太皇太后因母儀而崇上徽稱者可比况朕臨御六

十年以來敬 天法 祖勤政愛民及拓土開疆諸實政彰彰可
考又何藉聖神文武等文字虛示尊崇且以臣子而稱揚君父本
屬後世沿用虛文於理原未盡協我 聖祖仁皇帝平定三藩及
恭遇 慶節從前臣工等屢有以上尊號爲請者 聖祖皆卻而
弗許 訓諭煌煌實可爲萬世法今朕特豫行降旨將上尊號一
事停止此卽朕效法 皇祖之心亦卽御極初年齋心默禱不敢
上同 皇祖紀年之數之初念也將來嗣皇帝及臣工等皆當恪
遵朕諭不必復有瀆請朕惟敬祈 昊貺精神純固康彊逢吉嗣
皇帝稟承指示克肩負荷海宇熙和治臻上理此卽國家吉祥盛
事况太上皇帝稱號已極尊崇嗣皇帝躬率臣民以天下養尤爲
古今至隆盛軌又何必徒尙繁文務爲增美耶至朕歸政後應用
喜字第一號玉寶鐫刻太上皇帝之寶玉冊卽將御製十全老人

之寶說鐫刻作爲太上皇帝寶冊用彰熙朝盛瑞將來嗣皇帝亦能如朕之懋承 天眷壽屆期頤再舉上儀一切典禮皆可敬謹遵循實我國家億萬年無疆之福將此通諭中外知之○諭俘習渾前欲棄藏一事固屬乖謬但念伊係糊塗懦怯無識未至僨事著加恩釋回富勒渾於閩浙總督任內收受相沿陋規其咎雖重但念其年老亦著加恩釋回○諭據宗人府奏晉封福康安貝子或世襲罔替或令降等承襲請旨等語福康安前在臺灣廓爾喀等處軍前甚屬奮勉卽應照軍功出力之員准其世襲罔替但福康安係 孝賢皇后之姪究非宗室可比其貝子爵著承襲三世後再行照例降等列爲不入八分公令其世襲罔替○丁丑免江西山陽等十州縣借帑攤徵銀兩

冬十月戊寅朔諭軍機大臣等福康安和琳帶領官兵攻堅克險

已偪賊巢所得大寨落不下四十餘處而瀘溪隆圍兩路亦同時大獲勝仗是官兵各路雲集已將賊匪四面圍困無從逃竄福康安和琳著賞給上服貂尾褂各一件額勒登保德楞泰貂褂各一件以示嘉獎○己卯以關槐爲內閣學士

由翰林院侍講學士遷

順海爲左

副都御史

山通政使遷

○庚辰諭福康安和琳訪得首逆吳半生從鴨

保寨來至高多寨卽四面攻圍不遺餘力將首逆吳半生擒獲見在乘勝長驅直攻鴨保等處賊巢覽奏實深嘉慰此次逆苗滋事福康安和琳統領大兵於崎嶇險阻蠻煙瘴雨之中有戰必克朕卽知成功在卽特沛恩綸福康安晉封貝子和琳封爲一等宣勇伯甫及十日而福康安和琳已將首逆吳半生俘獲逆黨吳隴登等聞風膽落斷不能稍延殘喘奏凱獻功剋期可至福康安和琳著再交部從優議敘福康安之子德麟前已承襲恩賞輕車都尉

加恩賞給副都統職銜在御前侍衛上行走和琳賞繫黃帶以旌
勞勩孫士毅畢沅姜晟馮光熊於辦理糧餉軍火等事均無貽誤
亦著交部分別從優議敘福甯雖未能督兵進剿而幫同籌辦亦
俱無誤福甯惠齡著交部議敘其帶兵打仗奮勇之額勒登保德
楞泰花連布常明綸布春五人俱著從優議敘其興兆觀成珠隆
阿那丹珠豁隆武色靈額阿哈保温春定西爾巴蘭多隆武富蘭
富森德西津泰常山吉蘭泰富魁德勝扎隆阿張玉龍富志那趙
德功張永祺王威甯楊遇春馬瑀施縉德甯阿林布姜敏功陳紹
先程文翰雙林謝汝誠吉林泰魏攀舉方和應元寬王玉龍五十
一緒大業張明誠唐文高王雄黃世雄俱著交部議敘打仗出力
之滿漢屯土官兵著普賞一月錢糧其守卡護糧兵丁著查明賞
給半月錢糧至沿途臺站文武員弁馳遞軍報迅速無滯並著各

該督撫查明一體咨部議敘兵夫照例加賞以示旌功志喜優恤
勤勞至意○癸未諭回民女子婚嫁安集延例應不准攜歸但此
內有遺嫁至今相沿數世之家此次姑聽其攜往其邁瑪特什哩
布之妻亦照此辦理嗣後將回女嫁安集延爲妻之處嚴行禁止
永以爲例違者從重治罪○甲申諭前據長麟魁倫查出伍拉納
浦霖在督撫任內得受鹽規及抽詳銷案等款節經嚴降諭旨交
長麟等徹底根究並諭長麟吉慶將伍拉納浦霖任所及原籍貲
財嚴密查抄茲據長麟等奏查出伍拉納浦霖兩次各得受廈門
同知黃翼邦銀九千二百兩並訊出錢受椿因長泰縣林薛二姓
械鬪一案該府全士潮拏獲多犯錢受椿以所拏兇手未確飭令
提案至省審辦全士潮恐延宕受累餽送錢受椿朝珠呢羽繡料
等物又得受該縣顧挾金葉三十兩錢受椿不滿愁整仍不卽時

審結致拖斃十命等語又據汪志伊奏查鈔浦霖原籍貲財查出見存銀錢及埋藏銀共二十八萬四千三百餘兩房屋地契共值銀六萬餘兩金七百餘兩其餘朝珠衣服玉器等物尙不在此數而伍拉納先經查鈔京中家產內如意一項多至一百餘柄此與唐元載查籍家財胡椒至八百石何異伊二人貪黷營私殊出情理之外經朕親加廷鞫伊二人俱供認婪索不諱伍拉納浦霖受朕厚恩用至督撫乃於地方洋面一切廢弛又任意貪饕以致各州縣倉庫虧缺纍纍並任用錢受棒等通同一氣於人命重案竟敢訊法徇情抽詳銷案展轉稽延拖斃十命伊等身任督撫而蕩檢踰閑婪贓藐法至於此極實屬昧良負恩罪無可逭伍拉納未嘗學問或不知潔己奉公之義至浦霖係科甲出身由寒素用至巡撫乃一味貪黷無厭罔顧廉隅尙得謂之有人心乎見交軍機

大臣會同刑部從重定擬具奏外至錢受椿身任臬司乃乖張任性惟知逢迎上司遇事婪索甚至械鬪重情亦有意刁措勒索全士潮顧揆朝珠金兩等物尙復不滿慾壑延閣日久拖斃無辜多命此而不加以懲儆何以肅吏治而正官常著該督撫卽將錢受椿鎖拏派委委員解京交部從重治罪毋再任途次病斃倖逃顯戮伊轍布係該省藩司輒與庫吏周經串通分肥侵虧帑項見據長麟等奏伊轍布因病身故實爲倖免刑誅但恐別有畏罪自盡情弊仍著魁倫等嚴查據實具奏朕近年以來辦理庶獄多從寬宥如王亶望等子嗣俱著加恩釋放回籍督撫等遂爾無所儆畏任意妄行朕深引以爲咎今伍拉納浦霖如此貪污敗檢而其子嗣仍令安居何以示懲所有伍拉納浦霖伊轍布錢受椿之子嗣如係官職生監槩行斥革俱著照王亶望之子發往伊犁充當苦

差以昭炯戒至此案前經魁倫參奏特派長麟由廣東前赴閩省秉公查審乃伊節次奏到之摺於伍拉納浦霖等扶同舞弊及婪索賕款並不早行查奏直至朕屢次飭諭嚴查始行和盤托出長麟向好沽名取巧而於此案始終迴護袒庇瞻徇意存化大爲小殊負委任深恩斷難望其改悔振作豈可復膺海疆重寄長麟著革職自備資斧來京候旨魁倫扶同觀望亦應治罪但念此案究係由伊發覺姑從寬宥所有閩浙總督印務卽令魁倫暫行兼署姚棻前在汀漳道任內應賠銀兩係所屬州縣虧缺之項尙無自行侵那情事著加恩令其暫護福建巡撫事務俟朕簡放有人再行來京候旨魁倫姚棻務須感戴朕恩將地方一切廢弛虧缺及洋盜等事加意整頓緝捕勉贖前愆以副朕宥過施恩之意見在湖南苗匪已將首逆吳半生生擒大功指日卽可告竣已諭福康

安於善後事宜略加布置卽交與和琳一手辦理迅赴該省大加整頓魁倫姚棻於福康安未到之先務當實力籌辦悉心經理毋得稍存觀望致令地方事務再有廢弛自取重戾朕於臣下功罪一秉大公至正卽如閩省此案朕初非有意查訪而伊等貪黷廢弛款蹟疊經敗露自不得不嚴辦示懲各督撫惟當各矢天良倍加儆惕伍拉納浦霖等卽前車之鑒也將此通諭知之○諭軍機大臣等蔡新以大學士予告在籍朕念其耆舊老成眷注優隆恩禮兼至伊感激圖報亦當與他人不同其平素謹慎於地方尋常公事不輕干與本屬措紳居鄉之理至若閩省州縣倉庫在在虧缺積至二百餘萬之多督撫藩臬大員種種婪贓盈千累萬甚至臬司竟敢於人命重案舞文勒索官方吏治敗壞至於此極蔡新在籍閣臣乃亦視同膜外從無一語陳奏朕從前於蔡新素加恩

禮今乃扶同隱諱自比寒蟬全無體國公忠之意殊負朕數十年
眷禮深恩蔡新清夜捫心甯不自愧著將因何隱忍不奏之處據
實明白同奏○乙酉諭朕自臨御以來勤求民隱日有孜孜惟期
藏富於民家給人足仰荷 昊蒼眷佑 列祖貽庥寰宇昇平重

熙累洽行慶施惠閭閻澤頻加節經普免天下漕糧三次地丁錢糧
四次其餘遇有偏災隨時蠲賑不下億千萬兩近將各省積欠錢
糧槩行蠲免又復數千餘萬兩所以子惠元元休養生息者至周
且渥今朕紀年慶符周甲丙辰元旦舉行歸政典禮爲嗣皇帝登
極初元大廷授受篤祜延釐實爲曠古吉祥盛事允宜廣沛恩綸
俾薄海羣黎共霑湛愷本欲於新正傳位後降旨但思二月間卽
屆開徵之期恐遠省接奉稍遲著卽將嘉慶元年各直省應徵地
丁錢糧通行蠲免以示朕與嗣皇帝愛育閭閻同錫恩施至意其

如何按年輪免之處該部查照覈議具奏施行○丙戌諭軍機大臣會同刑部審訊伍拉納浦霖婪索鹽務陋規屬員餽送贓累鉅萬以致通省倉庫錢糧虧空累累地方洋面盜案一切廢弛將伍拉納浦霖問擬斬決請旨卽行正法一摺此案前據長麟魁倫查奏到日朕以伍拉納身任總督乃於地方洋面任意廢弛又收受鹽規十五萬兩黃莫邦銀九千餘兩婪索多贓其罪自較浦霖爲重嗣據汪志伊查抄浦霖原籍家產查出見存銀錢及埋藏寄頓銀兩多至二十八萬其餘房屋地契物件尙不在此數經朕親加廷鞫據供得受鹽規二萬兩及收受黃莫邦餽賂九千餘兩外又得受知府石永福知縣史恒岱洋錢等物贓款累累是浦霖飭法營私貪黷無厭竟與伍拉納相埒從前陳輝祖國泰郝碩等雖皆敗檢踰閑自干法紀然陳輝祖止係偷換官物國泰等亦罪止勒

索屬員而於地方事務及緝捕盜匪等事尙未大至廢弛不辦是以從寬賜令自盡今伍拉納浦霖在督撫任內婪索鹽規或尙可恕其收受屬員餽送賊累鉅萬甚至人命重案竟敢藐法徇情拖斃無辜十命而於洋面盜匪又並不認真緝拏以致盜風日熾且伊轍布串通庫吏侵虧帑項錢受椿延案勒賄拖斃多命種種營私舞弊伍拉納浦霖竟若罔聞一任肆行無忌加之信任是其上下通同分肥飽橐置民生吏治倉庫錢糧於不問情罪已屬顯然朕從來不爲已甚罪坐魁首是以不加深究猶幸其事早經發覺得以大加懲創亟爲整頓否則地方吏治廢弛更不可問而漳泉等處米價騰貴商販不行小民待哺嗷嗷官吏更加剝剝幾致民不聊生更復成何事體前此福崧在浙江巡撫任內任性乖張侵用帑項於審明後卽寘重辟今伍拉納浦霖罪更浮於福崧是竟

不能全朕用人顏面而伍拉納自蹈重罪至於此極更爲有玷覺羅亦斷難稍從輕典免其肆市伍拉納浦霖俱著照擬卽行處斬並派倉場侍郎宗室宜興刑部侍郎阿精阿監視行刑以爲封疆大臣貪黷營私廢弛侵虧負恩昧良者戒此皆因朕數年來率從寬典以致竟有如此婪賊害民之督撫朕當先自責己嗣後各督撫等益當各矢天良倍加儆惕儻不知潔己奉公再有廢弛婪索等事伍拉納浦霖卽其前車之鑒毋謂不教不誠也○戊子諭前因魁倫參奏閩省倉庫虧缺及洋盜肆劫各情特派長麟由廣東前赴閩省秉公審辦乃伊節次奏到之摺於伍拉納浦霖等扶同舞弊及婪索賊款並不據實查奏直至朕屢次飭諭嚴查始行和盤托出是其沽名取巧於此案意存化大爲小殊負委任因降旨將長麟革職並將伊在京家產查封以爲孤恩徇庇之戒亦欲觀

其是否家擁厚貲如伍拉納浦霖之貪污肥橐以驗伊在督撫任內是否尙能謹飭或者亦如伍拉納等之貪賄積家產至三四十萬之多亦當別問今據查出房屋地畝衣服等件尙不爲多且長麟之罪止於好名觀望瞻徇而已其才具亦尙不至終於廢棄將來仍當加恩賞給職銜派赴新疆辦事所有見在查出長麟京中房屋地畝及衣服什物俱著交軍機處大臣酌擬加恩賞還以資當差之用朕於臣工罪譴無不權衡至當於懲創中曲寓矜全督撫等惟當各矢天良砥礪廉隅勉飭簠簋以副朕宥過施恩至意

○辛卯諭軍機大臣等魁倫等奏審明械鬪斃命各犯一摺已交軍機大臣會同該部速擬具奏矣錢受椿身爲臬司種種營私甚至延案勒賄拖斃多命罪不容誅前令解京原欲親加廷訊盡法懲治示儆今思伊職分尙小不足加之廷鞫外省押解人犯行程

不能迅速此時卽已起解亦不過甫入浙境且錢受椿倚恃督撫聲勢性情乖張貪縱妄爲閩省官民自必羣懷忿怨著傳諭魁倫接奉此旨如錢受椿尙未起解卽毋庸解京如已抵浙境卽著吉慶派委滿洲道員小心管解回閩交該署督撫親視刑夾二次重責四十板再傳集在省官員監同正法俾觸目儆心以爲飭法營私謬妄貪黷者戒至餽送錢受椿各員雖由上司勒索究非潔已守分之人僅予褫革未足示儆著交與魁倫等於清查虧空完竣後若該員尙有侵虧情節自應從重問擬若止於餽送亦當分別定以遠戍而此內史恆岱一員既送浦霖銀兩又送錢受椿物件石永福則於餽送浦霖一節尙思掩飾不卽自行供首此二人如另有侵虧之處固當按律問擬如亦不過止於餽送應擬遣伊犁此案貢緣各員俱當永不敘用以昭儆戒前降諭旨除浦霖等供

出餽送各員外不必再加深究以示不爲已甚之意然旣已供出

亦不得不加之懲創以肅官方而激吏治○甲午以恆傑爲內閣

學士

由太常寺卿遷

○乙未諭湖南苗匪滋事經福康安和琳統領大兵

痛加剿戮賊勢萬分窮蹙探知秀山兵少潛往滋擾冀圖牽綴大

兵經孫士毅督率將弁奮勇剿殺割獲首級二百餘顆生擒賊匪

楊老倫吳老四二名當卽審明正法所辦實屬可嘉於防守後路

事宜甚爲周到孫士毅著交部從優議敘其奮勇出力之將弁並

著孫士毅查明咨部議敘○軍機大臣等議奏丙辰舉行傳位大

典所有各該衙門並各直省應行遵辦事宜一丙辰年歸政 嗣

皇帝登極頒發傳位詔書一道鈐用 太上皇帝之寶次用 皇

帝之寶所有 恩詔條款一體敘入一 太上皇帝諭旨稱爲

敕旨一 太上皇帝仍稱朕字一丙辰年 太上皇帝起居注

嗣皇帝起居注交該衙門敬謹分纂一題奏行文凡遇 天祖
等字高四格擡寫 太上皇帝高三格擡寫 皇帝高二格擡寫
一恭遇 太上皇帝慶節稱 萬萬壽 嗣皇帝慶節稱 萬壽
一恭遇 太上皇帝萬壽慶節及元旦冬至令節賀表 嗣
皇帝萬壽慶節及令節賀表俱由內閣撰擬表式一體頒發遵照
一丙辰年恭進 列祖 列宗 實錄交內閣循照向例按期於
嗣皇帝前恭進一丙辰年恭遇 大祀由各該衙門具題 嗣
皇帝親詣行禮 中祀 小祀應分別親詣恭代之處俱循照向
例題請一經筵耕藉大閱傳臚各典禮屆期由各該衙門奏請
嗣皇帝循例舉行一恭遇 太上皇帝萬壽慶節令辰一切典
禮應用樂章另行恭擬交樂部遵用一恭遇 太上皇帝 嗣皇
帝慶節令辰及掖 輦巡幸地方內外大臣恭遞慶賀請 安摺

俱繕備二分呈遞其隨奏事件請 安摺俱照常繕備一分呈進

嗣皇帝批閱一外廷筵宴由各該衙門循例奏請 嗣皇帝恭

奉 太上皇帝親御宴座 嗣皇帝侍坐一切儀注臨時具奏一

各部院衙門題本改籤放缺奏派各項差使俱循例題奏恭候

嗣皇帝批閱遵行其各部院衙門及各省題奏事件俱照常式恭

繕 皇上睿鑒字樣後書嘉慶年號按照向例呈進不必繕備二

分一御門聽政 嗣皇帝折本示期遵辦一鄉會試殿試朝考散

館及一切考試題目由各該衙門循例奏請 嗣皇帝命題考試

一 嗣皇帝登極後應請 太上皇帝敕旨 冊立皇后所有應

行典禮交各該衙門循例遵行一丙辰年元旦 奉先殿 堂子

行禮在未 傳位以前 皇太子隨 皇上行禮一陛見文武大

員及新授道府以上具摺恭請 太上皇帝恩訓 嗣皇帝恩訓

一丙辰新正遞丹書克仍係奏 太上皇帝詞句且有賀六十年
國慶之事應仍於 太上皇帝前恭遞得旨依議○丁酉賜邸飛
虎等三十二人武進士及第出身有差○戊戌 上諭 皇太子
皇子軍機大臣曰朕續紹洪圖懋膺 景祚仰荷 祖 宗眷佑
篤祐延釐周甲紀元舉行歸政典禮一切事宜斟酌成法期於可
行不事虛文我子孫皆可永遠遵循惟念禮經所載廟制恭崇天
子享祀告虔惟於祖廟升禋展孝至漢代始別立原廟後世踵行
故事增置滋多其制原非近古我朝開國承家於 太廟歲時禘
祫對越駿奔典制最爲隆備又倣原廟及前明之制在 奉先殿
以時行禮已足伸愾聞優見之恩雍正年間復於景山建 壽皇
殿乾隆年間於圓明園移 恩佑寺奉安 皇祖神御於 安佑
宮敬將 皇考神御一體崇奉所謂有舉莫廢朕不敢奉 皇考

神御於 雍和宮意在此也然揆諸古制已屬有加此後更可毋庸增設我國家景運延洪繩繩萬禩若繼體之君皆欲特爲所生崇祀以展孝思於父皇平日居處燕息之地奉安御容非特於禮制未符而宮庭之內供奉亦無餘地且增設處所過多豈能一一躬親行禮勢必別遣恭代轉非精禋專壹之義朕御極以來因雍和宮爲 皇考肇封潛邸禮應祇肅潔蠲不可賜爲第宅爰卽舊時宮殿供佛莊嚴每歲親詣拈香以伸瞻慕又 慈寧宮爲

聖母皇太后所居頤和益壽最爲吉祥福地後世子孫逮事慈幃卽可於此承歡隆養至重華宮爲朕藩邸時舊居朕頻加修葺增設觀劇之所以爲新年宴賓廷臣賦詩聯句及蒙古回部番眾錫宴之地來年歸政後朕爲太上皇帝率同嗣皇帝於此臚歡展慶我後世子孫亦能如朕之躬膺上壽諸福備臻再舉行禪授盛典

即可遵循例事太上皇帝於正殿設座嗣皇帝於配殿設座以迓
蕃禧而伸孝養實乃億萬載無疆之慶朕臨御六十年殿庭園籞
俱爲朕臨憩之所將來我子孫祇循前典惟當於 壽皇殿 安
佑宮舊奉 神御處所一體展敬足抒孺慕設因重華宮係朕藩
邸舊居特爲崇奉勢必扃閉清嚴轉使歲時錫慶之地無復燕衍
之樂何如仍循其舊俾世世子孫衍慶聯情爲吉祥福地之爲愈
乎見在重華宮陳設大櫃一對乃 孝賢皇后嘉禮時粧匣其東
首頂櫃朕尊藏 皇祖所賜物件西首頂櫃之東尊藏 皇考所
賜物件其西尊藏 聖母皇太后所賜物件兩頂櫃下所貯皆朕
潛邸常用服物後世子孫隨時檢視手澤口澤存焉用以篤慕永
思常懷繼述是則孝之大者正不在多爲崇奉以致貽禮煩則亂
之戒也著將此旨敬錄二通一存貯重華宮一存貯上書房用昭

世守○諭康基田向於河務情形尙爲熟習是以在臬司任內令其兼管河務但江南刑名事務較繁恐康基田不能兼顧見在山東運河道羅煥病故運河關繫糧運兼有黃河事務亦關緊要而山東臬司一缺較江南尙簡康基田著調補山東按察使仍兼管河道事務其江蘇按察使員缺卽著布顏調補山東運河道員缺著策丹調補○諭軍機大臣等長麟等覆奏庫吏周經與伍拉納等通同分肥一摺周經以微末庫吏侵虧帑項多至八萬餘兩實屬目無法紀審明後卽於該處正法以示炯戒至此案魁倫以將軍署理督篆於地方事務未能諳悉長麟久任封疆經朕特派前往查辦乃一味沽名取巧殊負委任是以降旨革職實爲權衡公當想長麟亦自當心服也○己亥 上諭 皇太子皇子軍機大

臣曰國朝舊典最重祭

神如遇有服制百日之內例不雍髮卽

不舉行祭祀朕思三年之喪自天子達於庶人通行已久從前

皇祖升遐時 皇考卽欲行三年之禮經王大臣等再四敦勸勉

從國制 皇考龍馭上賓之日朕亦欲倣行古禮時王大臣等亦

曾奏勸朕皆不允因奏知 聖母皇太后蒙 嚴諭皇帝此舉差

矣我朝舊制服孝不應薙髮設三年之久不薙與前代漢人蓄髮

何異且祭 神最爲吉禮若因不薙髮遂三年不祭 神更非吉

事且於國典有關此斷斷不可之事朕承 慈訓諄諄實爲至當

不易初未念及此也彼時卽祇遵 聖母訓諭不敢泥古今朕仰

邀 昊眷御極六十年舉行歸政大典凝禧篤祐衍慶方長將來

嗣皇帝如亦欲倣行古禮當思天子之孝與士庶異我皇清之制

與漢姓殊嗣皇帝仔肩重器惟當效法 祖宗及朕敬 天愛民

法 祖勤政勉承付託此卽孝之大者且朕歸政後嗣皇帝以天

下養仰承朕志舉措得宜俾海寓咸臻郅治合萬國之歡以奉予
一人甯不愈於斤斤法古耶特恐後來書生之見猶不免以事不
師古爲言不知純孝篤慕惟在寸心之誠孔子所答宰予之語但
當存此心而難盡拘其迹若必泥行此禮則蓄髮三年又與改裝
漢人何異且必有因此而愆愆改服制者前代北魏遼金元初亦
循乎國俗後因惑於浮議改漢衣冠祭用衮冕一再傳而失國祚
是以 祖宗垂訓無得改用漢人服色實萬萬年貽謀燕翼之道
設云天子應服衮冕以祀天不服衮冕卽非敬天之義則我國家
用本朝禮服將事 郊壇百數十年來累洽重熙懋膺 洪貺我

聖祖仁皇帝踐阼六十一年逮至朕躬紀元周甲復舉行禪授
盛典享國延長兩朝共閱百二十餘年之久 昊天眷佑之隆孰
踰於此較之北魏遼金元輕改服色轉不克享天心未數傳而不

祀者得失豈不彰明較著哉若後世無識之徒復有循古衣冠之
議者卽可執此論以破其迷總之事貴斟酌成法期於可行我國
家素敦醇樸不尙繁文卽如本日太常寺具奏准禮部咨稱 孝
儀皇后神牌升祔 奉先殿前期告祭 天 地 太廟一事亦
未免失當 孝儀皇后乃朕因係嗣皇帝生母恩旨冊贈止應於
奉先殿祭告若因此而舉行 天 地 廟祀大典轉鄰於瀆
已著不必舉行後世子孫遇有冊贈母后卽遵朕此旨辦理以昭
虔敬而省煩瀆此旨亦著敬錄二通一存貯上書房一存貯內閣
我世世子孫其欽承無忽○庚子命直隸人員迴避順天府治中
員缺○癸卯諭我國家重熙累洽景運昌明綏萬屢豐中外禔福
所以涵濡休養咸登仁壽者實爲史冊所罕觀我 皇祖聖祖仁
皇帝冲齡踐阼統馭寰區仁漸義摩熙熙皞皞康熙年間曾舉行

千宴宴與天下臣民躋壽萬而迓繁禧爲千載一時之嘉會朕誕膺丕緒敬紹鴻圖夙夜孜孜勤求治理仰賴 昊蒼篤佑 列祖

貽庥海宇乂安人民樂利曾於乾隆五十年乙巳恭照 皇祖千

宴宴舉行盛典迄今已逾十年逢吉康彊精神純固明歲丙辰紀

元周甲躬舉授受上儀尤屬曠古所未有天下臣民歌詠太平期

頤衍慶者此十年內又不知凡幾允宜再啓耄筵以紀重光之盛

著於明年正月初吉再舉千宴宴盛典惟是前次乙巳朕壽七旬

有五是以六十歲以上者俱令預宴明年朕壽八旬開六若仍照

前次六十以上卽准入宴年齒皆如兒輩長幼懸殊轉爲未協此

次應自七十歲以上准其入宴用示朕介景延祺申錫無疆至意

所有一切事宜著各該衙門照上次之例敬謹豫備○諭前因武

殿試呈進策題朕以文殿試向憑策以定甲乙至武會試所重原

在外場其發策廷試止係循例舉行是以每次所派閱卷大臣不過閣學京堂等官大學士尙書向未簡派所出策題率多敷衍成文而武舉等亦並不能條對自不應載入起居注 實錄之內隨命軍機大臣恭查據奏文武殿試策題向來俱屬載入等語乃本日朕恭閱雍正十一年 世宗憲皇帝實錄三月內文殿試策題載入而十一月武殿試止載閱視技勇傳臚並未開載策題朕六十年來恭閱 祖宗實錄周而復始豈轉有遺忘乃軍機大臣並不細心檢查兩三次率稱文武試策總裁 實錄護過飾非此豈尋常疏忽可比均著交部嚴加議處○ 皇太子率戶工二部臣奏欽惟 皇帝陛下 壽宇延洪 仁恩覃洽解阜叶虞琴之奏普邕民生懋遷率周府之模通流國寶近自水曹金部遠而藏地回疆莫不奏九式之良規仰 萬年之鴻號紹 三朝而裕後布

四極以懷珍寶厚生利用之資繫理財正辭之重越來歲丙辰紀
序周甲增籌適豫期嘉慶書年初元播 詔近承 慈旨合有寶
文陶鎔總本於 大鈞模範勉遵於良冶敢違 成命竊惕下懷
伏念錢布爲百貨之源事最切乎羣黎日用載祀歸 一人之統
化久洽乎丕冒海隅今八方 澤溥衡尊職貢虔通九牧惟三品
利頒泉府輪廓善倣五銖象有取於大員式孚 乾德號莫崇於
太上最稱 隆名宜秉 一尊長垂萬禩肉好悉依乎 軒製
幕文敬勅夫 義年如謂嘉興維新慶當同兆兩字本 庭閣之
命一元偕正朔之頒既經 渙號宣綸宜遵 辰告則請都官
制幣量酌卯期志 洪恩於初哉首基聿昭年紀鐫 寶字於京
垓億兆益衍符珍永荷 聖慈祇承 天貺子臣不揣冒昧謹率
同戶工二部臣合詞陳請自丙辰年爲始寶泉寶源二局錢文乾

隆嘉慶年號各半分鑄至各省俟開鑄之期亦準此例除新疆等處仍照舊遵行外其衛藏錢文均令照此辦理從此日引月長泉流山積體尊親之共戴鑄總由堯溥美利於不言行還權子俾荒陬僻壤咸樂範曰壽曰富之徵且越契踰繩共仰乾爲圖爲金之象得旨如所請行○甲辰冊贈令儀皇貴妃爲孝儀皇后 皇太子恭奉孝儀皇后神牌升祔 奉先殿奉安孝儀皇后神牌於孝賢皇后陵 享殿○以阿精阿爲刑部侍郎

十一月甲寅 上幸 皇十一子成親王永理第○丙辰諭本日吏部將保送御史之編檢等帶領引見閱摺內開載上兩次比較單翼槐一員五十五年先經該衙門保送未經記名而五十八年仍將該員保送所辦殊爲未當翰林院屬員甚多初次保送御史

既未記名自係朕看其才具不勝御史之任該衙門何得復將該員保送豈除此一人外卽別無合例堪保之員乎若此事係初次自應交部嚴議因令檢查舊案則各部院衙門從前保送御史俱有如此辦理者自係向來相沿錯誤因事隔年久不復追咎所有五十八年率行保送之掌院學士及未經駁正之吏部堂官均著加恩寬免宋史載趙普嘗薦某人爲某官屢奏不用有補牘復奏之事今朕用人行政一秉至公初不豫存成見大臣等亦不必以此沾公正之名嗣後各該衙門保送滿漢御史初次引見未經記名者下次不得再行保送著爲令○丁巳諭福康安和琳攻撲天星寨山梁統率大兵不避風雪於黑暗之中覓徑進發立時撲開木城七處石卡五處復乘勝將垂藤董羅等處苗寨全行攻克出力可嘉其另摺奏各路著名賊目業已盤獲正法尙有密行存記

之人一俟首逆全擒卽當趁此兵威立加搜捕所想周到甚合朕意除福康安已加宮銜外和琳著加太子太保銜見在該處風雪嚴寒並給福康安和琳上用黃裏元狐塔護各一件以資禦寒之具各官兵再各賞一月錢糧用昭鼓勵又吳半生被獲之後吳隴登自知罪重不敢復出有平隴苗頭吳八月帶領黑苗前來幫同守寨福康安和琳應卽用計離間或設法招徠儻狼狽爲奸不肯離散卽必一併生擒不留餘孽其詣營乞降苗眾自應暫准歸順但仍當防其反覆不可稍存大意又據奏派令諸神保清安泰押解吳半生起程見當勦賊喫緊之際額勒登保德楞泰正資其用今改派鎮道等極爲得當又鎮筸一路前此爲賊常往肆擾之處安知其不思由彼竄逸以冀苟延殘喘福康安和琳應於就近地方兵丁酌派前往幫同守禦至福甯旣不能帶兵勦賊僅令在鎮

守城豈尙不能辦理卽日大功告成若伊再不知奮勉致賊匪或由鎮筸他竄恐福甯不能當此重戾也○癸亥諭軍機大臣等吳八月係乾州首先起事之犯爲賊中緊要頭目官兵四面攻圍鴨保勢在危急復敢聚黨抗拒並挾制吳隴登不令投出可惡已極今福康安和琳設法首先擒獲實爲得計所有將領弁兵奮勇倍常降苗百戶寨長人等亦各爭先踊躍皆當從優獎賞其百戶隴老觀卽著賞給五品頂帶換戴花翎以示鼓勵又據奏請撥川黔兩省軍餉各一百萬兩照所請敕部行知撥給傳諭孫士毅馮光熊如川黔兩省有項可動卽先行動支墊發俟餉項解到再行歸款○乙丑 上命 皇太子居毓慶宮○諭皇太子生母已追封 孝儀皇后其家例宜晉封公爵但 孝儀皇后居 孝賢皇后之次著加恩暫賞一等侯爵世襲罔替交該旗照例揀選帶領

引見尋予世管佐領花沙布一等侯爵如例○己巳諭明年舉行千宴宴所有官員仍照上次之例年至六十以上俱准入宴○庚午諭魁倫等奏審明見在閩省各員虧缺倉庫各項分別治罪一招將虧缺數逾一萬兩以上之李堂等十名擬斬監候內秦爲幹李廷彩二員平日聲名狼藉請補入情重其餘虧空一千兩以上各員以次遞減等因所辦殊屬徇情寬縱已交軍機大臣會同該部覈擬速奏矣福建地方近年以來自督撫司道以及各府州縣通同一氣分肥飽囊玩法營私以致通省倉庫錢糧虧空疊疊盜風日熾甚至人命重案藐法徇情殊出情理之外伍拉納浦霖等身爲督撫廢弛婪索罪固難追然皆由此等劣員慫恿迎合上下句通遂至明目張膽毫無忌憚是伍拉納浦霖等之罹重辟實緣不肖州縣等釀成若轉使之倖邀未減又何以肅吏治而儆官邪

從前王亶望等在甘肅地方捏災冒賑婪索多贓然其罪不過侵蝕監糧而於地方倉庫尙不至任意虧空一經查出立將王亶望等明正典刑伊等之子發往伊犁示儆今閩省倉庫至於無處不缺民生吏治玩愒廢弛更不可問是王亶望之罪止於侵盜而伍拉納浦霖等藐法侵貪廢弛玩誤竟至害政殃民較之王亶望情節尤重此朕用人失當未經及早覺察當引以爲愧本日據魁倫等奏查明伊轍布委係因病身故所奏皆係虛言亦不值再加追究但伊轍布身爲藩司與庫吏周經串通侵帑竟得於途次病斃實屬倖逃顯戮而錢受椿任性乖張逢迎需索於械闖重案刁捐勒索拖累多命尤爲罪不容誅是以諭令該署督等將該犯解京本欲盡法懲治今魁倫等未接續降諭旨已將錢受椿在閩省正法亦屬倖免但伊二人如此貪污不法敗檢踰閑亦豈可令其子

嗣仍得安坐家居將來或可夤緣作官是宜照前此王直望等之例業降諭旨將伍拉納浦霖伊轍布錢受椿之子樂行發往伊犁充當苦差用昭炯戒此案本由魁倫參奏自係該署督以業經發覺不肯結怨於眾遂思從輕完結以致定擬寬縱殊負委任魁倫著交部嚴加議處姚秦甫經護篆隨同具奏亦有不是著交部議處總之朕於臣下功罪一秉大公至正不爲已甚而似此昧良太甚者又不得不去其已甚各督撫等惟當各矢天良倍加儆惕以伍拉納浦霖等爲前車之鑒慎勿蹈其覆轍所有辦理緣由著再通諭中外知之○甲戌諭軍機大臣等據福康安和琳奏擒獲起釁裝癩之緊要賊目並督兵痛勦抗拒苗匪情形吳八月之子吳廷禮等既與吳隴登互相仇殺非吳廷禮等爲吳隴登所擒卽係吳隴登爲吳廷禮等所害賊人彼此相殘既無慮其復相勾結而

官兵相機進剿正得趁賊匪離間之際一鼓成擒更可不勞而集
事福康安和琳當倍加奮勉速覲大功至吳廷禮等因吳龍登將
獻吳八月膽敢紆懷忿恨聚眾焚擄占據鴨保抵死負隅情罪甚
爲可惡務將各犯設法擒獲勿任遷延漏網又據奏吳龍登於大
兵攻克黃瓜寨後該犯卽有意投出因恐各路逆苗見伊投順必
將其寨落焚燒爭相仇殺總俟大兵到日再行立功自贖吳龍登
節次擒獲吳八月龍五斤較之石三保等始終怙惡者自然有閒
如再能將石三保石柳鄧生擒縛獻來營卽貸其一死尙屬可行
惟在福康安和琳相機酌量辦理以期迅速集事○設甘肅西甯
府貴德廳學校

十二月戊寅朔諭朕於明年歸政後凡有繕奏事件俱著書太上
皇帝其奏對著稱太上皇○諭軍機大臣等御書福字向於臘月

朔始行開筆頒賞本日正值開筆吉期年例皆書五福茲特多書二福字頒賜福康安和琳二人共迓春祺以爲迅卽成功先兆○己卯諭蔡新覆奏閩省虧缺倉庫及督撫大吏等婪賂不法未能留心訪察劾奏請交部議罪一摺各省鄉宦家居原不應干涉地方公事但蔡新以大學士予告回籍朕平日優加恩禮遇有地方大吏貪黷等事訪查得實理宜隨時入告今據奏實因年力衰頹無從覺察實應懷愧伊老憊亦止可如此所請交部議罪之處著加恩寬免其每年所得福字荷包例賞仍照常發去以示眷注○庚辰諭喀什噶爾等城各大臣秉公辦事毋令回民負屈○辛巳諭軍機大臣等江蘭奏地方情形一摺內夾片稱滇省山多田少民鮮蓋藏兼有蒸酒作踐等事已多方勸禁並令民夷日用飲食實力撙節等語所奏殊屬無謂民間釀酒種煙等事所在皆有勢

難官爲禁止從前科道中曾有條陳禁止種煙者以其不達事體
交部議處況滇省地方夷人雜處此等習俗相沿之事又焉能飭
禁該撫職任封圻惟當於應辦事宜隨時整頓樽節愛養若似此
種煙蒸酒等細事紛紛勒禁並令胥役等前往查察必致藉端訛
索滋擾民夷是名爲勸諭樽節適以擾累地方卽此爲不曉事體
之一端江蘭因初任巡撫爲此無謂之奏借以見長殊屬非是除
已於摺內硃筆抹出外仍著傳旨申飭○甲申諭長麟著加恩賞
給副都統職銜令其自備資斧前赴葉爾羌辦事更換明興○乙
酉諭明年元旦御內殿受賀嗣皇帝之皇后仍照每年常例於重
華宮行禮班次在公主福晉之前公主福晉與嗣皇帝及皇后均
係同輩仍應行家人常禮俱不必跪叩若皇后受冊封及御交泰
殿蠶壇諸大禮公主福晉自應照外班舊例行再嗣皇帝之貴妃

妃嬪等同皇子等側福晉一例其職分俱不至在朕前行禮明年元旦卽著照此旨交與總管太監存記屆時遵行○丁亥追封孝儀皇后父原任內管領清泰爲三等公母楊佳氏爲公妻一品夫人○戊子諭軍機大臣等據福康安和琳奏賊匪在附近天星寨一帶山坳屯聚攢集福康安和琳董率官兵將大小天星寨攻克復連克黃沖口賊卡十三處直抵得盤山梁可嘉之至務宜倍加奮勉迅奏成功見在年節已近所有例賞前已發往再賞給福康安和琳琿瑯三鉞洋表各一箇黃辮大荷包各一對小荷包各四箇並賞給額勒登保德楞泰琿瑯二鉞洋表各一箇黃辮大荷包各一對小荷包各二箇花連布白玉搬指一箇黃辮大荷包一對小荷包二箇倫布春阿哈保色靈額西津泰白玉搬指各一箇花大荷包各一對小荷包各二箇其滿漢屯土各兵再普賞一月

錢糧此次降苗隨同堵禦甚爲出力伊等向無錢糧亦加恩賞給一月錢糧以示鼓勵又據畢沅等奏鼓勵降苗縛獻賊目石老四所辦尙好但降苗楊鼎元等因縛獻石老四以致吳八月之子挾讐報復將平郎寨楊二寨降苗數十戶全行燒毀搶劫一空而楊鼎元家屬又被殺害尤爲可憫楊鼎元應賞五品頂帶逃出各難民均善爲安撫以示獎恤○庚寅諭內閣衙門因丙辰正月初四日降敕冊立嗣皇帝元妃爲皇后照例撰擬恩詔進呈似此繁文所請可不必行明年元旦歸政後朕爲太上皇帝嗣子爲皇帝其嫡妃自應立爲皇后此乃宮廷一定禮儀止當循照向例祭告

天地 宗廟用昭茂典足矣何必撰擬恩詔布告天下多此緘節繁文皇后正位端闈恪修內職非如皇太后爲母后分應尊崇者可比我 朝家法宮壺肅清從不干與外事來歲舉行冊立皇

后典禮不特恩詔不必頒發卽王公大臣以及外省督撫等亦毋庸因立后於朕前及嗣皇帝皇后前呈進慶賀表箋且皇后壽節暨元旦冬至與外庭無涉嗣後俱當永行停止箋賀並著爲例以肅體制而垂法守○辛卯諭長春宮向有 孝賢皇后東珠頂冠東珠朝珠等件在彼陳設因思國家宮殿俱有定制若皇后服物陳設宮中則其地卽屬清嚴未便再行居住一朝之后服物陳設一宮世代相承禁鑲幾無餘地况此等貴重物件原爲端闈服飾自當爲世代皇后之用又何必虛爲供奉致占宮闈之地朕前降諭旨以重華宮爲每年錫宴之所將來不應復安神御當循其舊以爲世世子孫衍慶聯情吉祥福地卽猶此意所有長春宮供奉 孝賢皇后東珠頂冠東珠朝珠等物嗣皇帝卽位後皇后卽可服用從此雲初繼慶量畧增輝更爲無疆盛事此旨著交內閣

上書房內務府敬事房各存貯一分以垂法守○定革職留緝人員獲犯後分別開復例○癸巳諭朕紀年周甲於丙辰元旦舉行授受大典王公等及文武百官慶賀禮成本應筵宴但是日朕御太和殿授寶後嗣皇帝御殿登極若於是日復舉行筵宴儀節未免繁縟是以初四日特舉千宴宴盛典臚歡申慶宣愷頒酺卽以示元正授政於甯壽宮初御皇極殿錫賚受賀普迓春祺諸慶俱備其餘繁文不必行矣○甲午諭每歲 太廟祫祭 九廟合饗典禮綦崇朕御極以來肅恭將事於 中位上香畢至 列祖列宗前以次上香乾隆三十七年朕春秋六十有二因舊行儀注上香往返次數較繁恐少有失儀轉不足以將誠敬曾令大學士等定議請派親王皇子八人分別隨同上香稍節步履之勞明歲元旦舉行授受大典本年祫祭尤當展恪升馨敬申昭格是以乙

已年歲暮祫祭禮成御製詩內卽有期待將歸政拈香親詣周之
句其時已豫擬六十年祫祭將屆歸政之期於 列祖 列宗神
位前仍俱親詣拈香不令諸皇子恭代用展積忱勉符舊典今朕
仰荷 洪釐壽屆八旬開六精神純固自揣 廟中行禮於 列
祖 列宗前一一躬親上香致敬尙所能勝此次歲暮祫祭朕仍
當敬率舊儀 九廟以次上香用示精禋昭告之意○丙申命義
民購獲要犯多名者量予職銜不過得七品○丁酉諭西成著調
補陝西布政使其四川布政使員缺著林僑補授從前因林僑之
父係福康安家僕門地卑微曾降旨內用不過郎中外用不過道
員而止嗣因林僑在後藏催運軍糧屢有勞績用人之際不得不
格外施恩是以先賞給按察使銜旋經擢補此次進剿苗匪林僑
在川省秀山一帶籌辦軍糧等事井井有條福康安和琳以勤能

得力專摺保奏復經降旨賞給布政使銜遇有四川湖廣等省藩司缺出卽行補授兩司大員表率全省原應視其出身酌爲限制但當軍務需人似此勤奮出力之員豈可拘其家世不加獎勵況林雋見任臬司若停其外擢轉用京堂則班次豈不更優今將該員補授藩司實因軍務需才起見該員當倍加感奮以副逾格恩施至意所遺四川按察使員缺楊揆亦係軍營得力之員前經賞給按察使銜著加恩補授以示獎勵○壬寅諭軍機大臣等朱珪奏英吉利國呈進表貢一摺該國王因前年貢使進京賞賚優渥特具表文土物呈進具見惓忱雖未專使來粵有何不可已准其賞收並發給敕書一道諭以爾國遠隔重洋上年遣使恭齋表貢航海祝釐朕鑒爾國王忱悃令使臣等瞻覲與宴錫賚駢蕃頒發敕諭回國並賜爾國王文綺珍玩用示懷柔茲爾國王復備具表

文土物由夷船寄粵呈進具見恭順之誠天朝撫有萬國琛寶來
庭不貴其物惟貴其誠已飭諭疆臣將貢物進收俾伸虔敬至天
朝從前征勦廓爾喀時大將軍統領大兵深入連得要隘廓爾喀
震懾兵威匍匐乞降大將軍始據情入奏天朝仁慈廣被中外一
體不忍該處生靈成就殲除是以允准投誠彼時曾據大將軍奏
及爾國王遣使前赴衛藏投稟有勸令廓爾喀投順之語其時大
功業已告成並未煩爾國兵力今爾國王表文內以此事在從前
貢使起身之後未及奏明想未詳悉始末但爾國王能知大義恭
順天朝深堪嘉尚茲特頒賜爾國王錦段等件爾國王其益勵盡
誠永承恩眷以副朕綏遠敷仁至意朱珪接到後可卽交與該國
大班叻啣轉送回國俾該國王益加感戴恭順以示懷柔至天朝
官員例不與外夷交際其致送前任總督監督禮物朱珪飭令寄

同所辦亦是又另摺奏率獲洋盜審明辦理一案該省盜犯見獲多名可見粵東洋面盜犯亦未能接捕淨盡朱珪屢次董率嚴拏辦理尙屬認真但仍當飭令文武員弁隨時躡緝不可日久生懈以期海洋甯謐方爲妥善○甲辰敕諭琉球國世孫尙溫曰朕惟共球翕集聿昭有截之規琛賚虔通用表維藩之節爾中山國王世孫尙溫攝領疆隅恪循世守值朕紀年周甲來歲丙辰元旦傳位皇太子改爲嘉慶元年朕稱太上皇帝國慶駢蕃適該國貢表遠至是用降敕嘉諭並賜世孫文綺等物爾其敬受以俟錫封自丙辰年以後凡有呈進表文俱書嘉慶年號至朕傳位後凡軍國大政及交涉外藩事件朕仍訓示嗣皇帝一切錫賚綏懷悉倍恆典爾其祇承恩錫益勵盡誠以副寵眷○乙巳諭軍機大臣等福康安和琳奏於積雪未化之時督率將弁等分路進攻將高斗山

梁搶占奮勇追趕並卽趁勢撲入苗寨縱火焚燒斃賊甚多將爲
首賊目廖老暮隴老西二犯擒獲正法可嘉之至特賞福康安和
琳大荷包各一對小荷包各四箇內貯金銀鏤各二箇金銀錢各
二枚額勒登保德楞泰與兆觀成花連布大荷包各一對小荷包
各四箇內貯金銀鏤各一箇金銀錢各一枚五錢重銀鏤各二箇
綸布春阿哈保那丹珠富志那色靈額大荷包各一對小荷包各
二箇銀鏤各二箇銀錢各二枚滿漢屯土各兵俱再賞一月錢糧
以示獎勵○丁未 上以來歲丙辰元旦傳位 皇太子爲嗣皇
帝前期遣官告祭 天 地 社稷 宗廟 奉先殿○是歲朝
鮮緬甸南掌暹羅安南琉球英吉利來貢○會計天下民穀數各
省通共大小男婦二萬九千六百九十六萬八千九百六十八名
口各省通共存倉米穀三千九百七十五萬三千一百七十五石

三斗三升三合零

跋

聖學日講起居注官新嘉坡待詔太衛安黃德樹校閱此稿勢屬纂修之始臣黃謙謹撰

洪惟我

皇清光宅函夏

列聖續承

至德

豐功度越隆古

仁育義正海寓蒙福宜勒成書昭示萬禩凡有血氣戴履

高厚游息酣嬉幾忘

帝力紀載闕略聽觀茫昧應以宣

上德抒下情匪他人任實惟史

臣貴臣

前見蔣良騏東華錄纂目

開國以來迄於雍正頗具條理乾隆以後未聞續撰若

東華續錄

後跋

皇朝武功紀盛

聖武記肅亭雜錄諸書於乾隆朝事實多所采摭至

微猷

鴻誥之垂貽典章名物之富美六十年中燦若星列掇拾舛漏咸所不免自非年經月緯難可尋究考之往代以本朝國史編年勅自宋司馬光稽古錄厥後作者約數十家李燾續資治通鑑長編明鄭曉吾學編史裁特備而宋林駟皇鑒箋要取寶訓實錄國朝會要爲注固知國史官書咸資採錄體例斯存亦載筆之柯則也伏讀乾隆二年五月

上諭曰向來

列祖實錄聖訓告成之後皆藏之金匱石室廷臣罕得見者朕思列祖聖訓謨烈昭垂不獨貽謀於子孫亦且示訓於臣庶自應刊

刻頒示俾人人知所法守用是有刊

五朝聖訓之

命若乃

方略則例悉載

絲綸

寄諭

硃批並得宣示仰見

聖人示寰海以大公開臣庶之蒙域

醴恩厚意隻古無兩惜乎

欽定諸書頒賜有限雖在士夫無由徧觀至於閭巷爾絕闕仰臣

愚竊謂

本朝二百餘年來所以陶冶羣倫無微不至故名臣耆碩項

背相望而或服吏者練法而玩刑業儒者襲經而市利蘊
孽釀孽戎生伏莽一旦潢池盜弄鹿麋挺狽噬杼柚告空
宵旰慮竭天下之力僅迺平之而元氣休養又需數十百年
矣雖天地之大物不答施豈德風偃草之效有時或夷毋
亦

朝廷條教不能戶喻

彝訓之垂與世推移簡冊無稽觀聽未洽故致然歟臣備員詞曹
編摩史館亦頗究心當世之務痛斯民無知與所以報
上德之未至仰體

大聖人公天下之心遠追前代李鄭述作近接蔣氏當日所錄凡
登載

諭旨恭輯

聖訓

方略編排月日稽合

本紀

實錄於制度沿革纂會典於軍務奏摺取

方略兼載

御製詩文旁稽大臣列傳成東華續錄一百二十卷乾隆一朝政
要大略具存不揣冒昧敬登梨棗欲得家置一編循覽紬
繹於以體

聖訓而遵正直蕩平之路書區區之意實在於此嘉慶而下槩本
盛具雍正以前錄視蔣氏加詳將以次刊行焉時在光緒
五年歲次己卯秋八月